

# საბუბა

№7(199)  
ივლისი  
2012

საქართველოს კათოლიკეთა ყოველთვიური მაცნე



გილოცავთ!





## „პიპარლამენტო“

საერთაშორისო ასპარეზზე საქართველო ნამდვილად გამოიჩინა თავისი გამალებული მშენებლობების კურსით: იგება გზები, იდება ხიდები, კეთდება კარგად მოწყობილი მოედნები, შადრევნები, შენდება სასტუმროები, ბინები, საავადმყოფოები, სკოლები, ეკლესიები... და, აი, 26 მაისს, ქუთაისში, საზეიმო აღლუმის დროს, გაიხსნა ახალი პარლამენტი; თავისი სივრცით ნაგებობა უბრალო და მრავალფუნქციურია, ამფითეატრის ფორმის, დიდი, ტრადიციული დარბაზით, მკაცრი კონტურებით; იგი შემინულია, მინა აქ ნამყვანი არქიტექტურული მასალა გახლავთ. შენობა ისეა გათხზული დიდ, მწვანე მოლზე, გეგონება მინაზე ახლახანს დაეშვაო, თითქოს სურს, განმუხტოს ის დაძაბული ატმოსფერო, რაც შეიძლება მის შიგნით სუფევდეს (გავიხსენოთ თუნდაც 2005 წლის 1 ივლისის სხდომა); ნაგებობა გამჭვირვალეა, – უკანასკელი პერიოდის მრავალი შენობის მსგავსად, – რაც ყველას მოუწოდებს გამჭვირვალობისკენ (ამ სიტყვამ მნიშვნელოვანი დატვირთვა შეიძინა გორბაჩოვის „პერესტროკიდან“ მოყოლებული); ნაგებობა დიდ, გაშლილ კარავსაც ჰგავს, მაგრამ ის ცის თაღს უფრო მოგვაგონებს, სადაც სიტყვა სრულყოფილად გახმიანდება და მეტი ასპარეზი მიეცემა მას. პარლამენტი ხომ ეტიმოლოგიურადაც ამას ნიშნავს: მისცე მეტი სივრცე სიტყვას. მაგრამ რომელ სიტყვას, ვის სიტყვას?... ადამიანი თავისი სიტყვით ფასდება, წერდა გასულ საუკუნეში მამა ლორენცო, კათოლიკე მღვდელი, რომელიც აქტიური და უახლესი მეთოდით ცდილობდა, თავის პატარა საკრებულოს ბავშვებისთვის წერა-კითხვა ესწავლებინა. სიტყვა „პარლამენტი“ გვახსენებს ასევე კულტურული ანთროპოლოგიის საერთო ხასიათს, სადაც ერთი კოლევიალური ინსტიტუტი შუამავლის როლს ასრულებს ხალხსა და მის წარმომადგენლებს შორის, როგორც ამას მონაშობს ბერძნული *poleis* (ასამბლეა) და *Senato Romano* (რომაული სენატი). პარლამენტის პირველი ჩანასახი ისლანდიაში ჩნდება 930 წელს. აქედან მოყოლებული, პარლამენტი შეიძლება მრავალნაირად მოვიხსენიოთ: როგორც პატარა

სასოფლო საკრებულოების მრჩეველი, როგორც ესპანური კორტეჟი, ან საფრანგეთის გენერალური შტატები, ანდა გერმანული ბუნდესტაგი ან კიდევ ინგლისური პარლამენტი (1248), თავისი ღორდთა პალატიო, – ყველა დანარჩენი საპარლამენტო გამოცდილების მოდელი.

საინტერესოა იმის გახსენება, რომ 1115 წელს, *Magna Charta* (თავისუფლების დიდი ქარტია), დიდი ქარტიის მიღებამდე ზუსტად ერთი საუკუნით ადრე, *cistercensenis* ბერები შეუდგნენ *Charta Charitatis* (საქველმოქმედო ქარტია) შემუშავებას, რითაც აბატების *Parlamentum*-ს ანიჭებდნენ მათი ორდენის უმაღლესი ხელისუფლების, *summa potestas*-ის ფუნქციას. დროთა მსვლელობაში პარლამენტი დაიხვეწა და გაიზარდა მისი კომპეტენცია. დღეს უკვე მას აქვს პოლიტიკური, საკანონმდებლო, საკოორდინაციო, კონტროლისა და საკონსტიტუციო გარანტიის ფუნქცია. თანამედროვე პარლამენტი შეიძლება ორ დიდ კატეგორიად დაიყოს: ისინი, რომლებიც ძირითად პოლიტიკურ ძალაუფლებას გადმოსცემენ, რამდენადაც გამოსატყვევებ თავისუფალ და პლურალისტულ საზოგადოებას, და დეკორატიული, რაც დამახასიათებელია ავტორიტარული, ან ერთპარტიული რეჟიმებისთვის. დემოკრატიული ქვეყნების პარლამენტში შიდა ორგანიზაცია ძალზე კომპლექსური და ცოცხალია: ნამყვანი როლი აკისრია კომისიების მიერ განხორციელებულ კონტროლს. კომისიების მიერ წარმოებული კორექტული სამუშაოები უნდა დაეხმაროს უმრავლესობისა და ოპოზიციის ურთიერთკავშირს.

თუკი საქართველოს ახალ პარლამენტს, – რომლის არქიტექტორიც გახლდათ ა. დომინგო და კ. ლაზარო, და ცნობილი იაპონელი ინჟინერი მ. კაუაგუკი, – პრეტენზია აქვს, რომ მისი გარეგნული იერსახე მეტყველებდეს ქართულ საზოგადოებაში მიმდინარე დიდ ცვლილებებზე (პრეზიდენტმა სააკაშვილმა იმ დღეს ხაზგასმით ისაუბრა დეცენტრალიზაციის მნიშვნელობაზე), მაშინ, ამავე დროს, ახალი პარლამენტი მზად უნდა იყოს ხალხის სამართლიან

მოთხოვნათა მისაღებად, რომელიც ამ ადგილზე თავის წარმომადგენლებს გზავნის. თუკი სიტყვა სივრცეში უნდა გახმიანდეს, შემდეგ ეს სიტყვა საქმეებში არ უნდა დაიკარგოს; დღევანდელ მსოფლიოში, რომელიც უფრო და უფრო აცხადებს პრეტენზიას „დემოკრატიულობაზე“, მძიმე კრიზისის განიცდის წარმომადგენლობითი სტრუქტურა, რადგანაც ის ვერ ასრულებს თავის ფუნქციას და აქვე, არ არსებობს სივრცე, რომელიც ხორცს შეასხამდა პარლამენტის მუშაობაში ხალხის პირდაპირ მონაწილეობას.

იმ საზოგადოებაზე, რომლის ხელისუფლება სხვა შენობაში ზის, ჯერ კიდევ ლენინი წერდა 1919 წელს, რომ „კაპიტალის ძალა ყველაფერია, ბირჟა ყველაფერია, ხოლო პარლამენტი და არჩევნები მარიონეტული თოჯინების თამაშია“, რომ აღარაფერი ვთქვათ „პარლამენტის კრეტინიზმის“ შესახებ მის დამამცირებელ მსჯელობაზე მარქსთან და ენგელსთან; მთავარია, უკეთ გავიგოთ პარლამენტის მნიშვნელობა, რომლის პრინციპიც ხალხის უზენაესობაა. მხოლოდ მაშინ, როდესაც პარლამენტი ასრულებს ერის სარკის ფუნქციას, მას შეუძლია გახდეს და ხდება ერის პოლიტიკური ორიენტაციისა და ცხოვრების მოწყობის ცენტრი, რომელიც გამორიცხავს, ან უნდა გამორიცხოს ჩაგვრა, ძალისმიერი მეთოდები, რევოლუციები. პარლამენტი ცენტრალურ ადგილს იკავებს პოლიტიკურ სისტემაში, ვინაიდან სწორედ მასში, და არსად სხვაგან, არ არის ასე თვალშისაცემი საზოგადოება, მთელი თავისი კომპლექსურობით, შემდგარი პარტიებით, ორგანიზაციებით, ალიანსებით. *პარლამენტი ცენტრალურია, ვინაიდან მასში ცხადდება და თვალსაჩინო ხდება ხალხის უზენაესობა.*

როდესაც 1999 წლის 14 დეკემბერს საზეიმოდ გაიხსნა

კიდევ ერთი პარლამენტი – სტრასბურგის ევროპარლამენტი, მისმა სტრუქტურამ დიდი აჟიოტაჟი და კითხვები გამოიწვია. ლუის ვეისის (*Louse Weiss*) ნაგებობა, თავისი მოდერნისტული და დაუსრულებელი ფორმით, ყველას მოგვაგონებს „ბაბილონის გოდოლის“ ცნობილ სურათს, რომელიც 1563 წელს დახატა პიტერ ბრეიგელმა. მას, ვინც კითხულობს, თუ რატომ აქვს ევროპის პარლამენტს დაუსრულებელი სახე, მისმა შემქმნელებმა უპასუხეს, რომ იგი „ევროპის დაუსრულებელ ბუნებას“ გამოხატავს. პასუხი შეიძლება დამაჯერებელიც კი იყოს, მათ პასუხებთან შედარებით, ვინც ფიქრობდა, რომ ეს ნაგებობა ერთგვარი გაგრძელებაა იმ საქმისა, რაც შეწყვიტა *ნუმრუდმა*, სახელგატეხილმა ტირანმა, რომელიც ღმერთის გამოსანვევად აგებდა ბაბილონის გოდოლს, რასაც ამტკიცებს ანტიკური კულტურის მრავალი ტექსტი, გარდა ებრაულისა.

ახალი პარლამენტი ერთგვარი ფსონია, რაც იდება ქვეყნის დემოკრატიული სტრუქტურებისადმი რწმენის გამოსანვევად, განსაკუთრებით იმ ქვეყნებში, სადაც სურთ დემოკრატიის გაძლიერება... და, როგორც ამბობენ, მიმართავენ ძალას, დაშინებას, სამსახურიდან გათავისუფლებას (რადგანაც ვილაცამ მონაწილეობა მიიღო ოპოზიციონერთა გამოსვლაში); ის, ვინც ამ ახალ ნაგებობაში პარლამენტარის მაგიდას მიუჯდება, შეძლებს ნამდვილად დემოკრატიული და სამართლიანი საზოგადოების შექმნაში თავისი ნების სრულად გამოხატვას?

ფილოსოფოსი კანტი (1724-1804) წერდა: „თუკი სამართალი კვდება, მაშინ დედამიწაზე ადამიანის ცხოვრებას აზრი არა აქვს“.

მამა გაბრიელე პრაგანტინი





## აშა წლის ივნისში...



**ნიგერია.** 17 ივნისს, „ბოკო ჰარამის“ მიერ კადუნასა და ზა-რიას ქრისტიანულ ტაძრებში განხორციელებული ტერაქტების შედეგად, ორმოცდაათი მორწმუნე დაიღუპა. „ტერაქტები თავისთავად შემზარავია, მაგრამ კიდევ უფრო საშინელია ის, რომ თავდასხმები უფრო ხშირად კვირადღეს ხორციელდება. დევნა და დაძაბულობა საზიანოა არა მხოლოდ ქრისტიანთათვის, არამედ ქვეყნის მთელი მოსახლეობისათვის, რომელსაც მშვიდობიანი არსებობა სურს“, – აღნიშნა წმიდა საყდრის პრეს-ცენტრის მდივანმა ფედერიკო ლომბარდიმ. ისლამური თანამშრომლობის ორგანიზაციამ (Organisation of Islamic Cooperation) დაგმო 17 ივნისს განხორციელებული ძალადობის აქტი. „სინმიდეთა დარბევასა და უბრალო მორწმუნეთა მიმართ ძალადობას არც ერთ რელიგიაში არ უნდა ჰქონდეს ადგილი“, – განაცხადა ორგანიზაციის გენერალურმა მდივანმა ეკმელედინ იჰსანოლუმ.

**ვიეტნამი.** პროვინცია კაობანგის ერთ-ერთი სოფლის თავის გადაწყვეტილებით თემიდან სამი ქრისტიანული ოჯახი განიდევნა. იგივე ბედი ენია ტაი-ნგუენის პროვინციის ერთ-ერთი სოფლის მკვიდრ ქრისტიანებსაც. ამგვარად თემთა მეთაურები ქრისტიანთაგან თავიანთი ტერიტორიების გათავისუფლებას ცდილობენ.

**ინდოეთი.** ჩჰატისგარჰის შტატში, ბასტარის ოლქში, ხელკეტებითა და დანებით შეიარაღებული ბრბო თავს დაესხა ადგილობრივი ქრისტიანული თემის მეთაურის ქალიშვილის დამკრძალავ პროცესიას. შეურაცხმყოფელი შეძახილებით, ბრბომ პროცესია სასაფლაომდე მიაცილა, იქ კი მგლოვიარეებს თავს დაესხა და მიცვალებულის დაკრძალვის საშუალება არ მისცა. გარდაცვლილი გოგონას მამამ პოლიციის ადგილობრივ გან-



ყოფილებაში საჩივარი შეიტანა. რეაგირება სამართალდამცავთა მხრიდან ამ დრომდე არ ყოფილა.

**ინდონეზია.** ხელისუფლების განკარგულებით აჩეჰ-სინგ-ქილის ოლქში დაიხურა 20 ქრისტიანული ტაძარი. უახლოეს დროში დაგეგმილია ამ ტაძრების სრული დემონტაჟი. „ტაძრების დახურვა და ნგრევა აჩეჰში, ეკლესიათა და ქრისტიანულ სამლოცველოთა ხშირი დარბევები კუნძულ იავაზე და ინდონეზიის სხვა კუთხეებში, ქვეყანაში მზარდ რელიგიურ შეუწყნარებლობაზე მიუთითებს“, – აღნიშნავს მსოფლიო ქრისტიანული სოლიდარობის (Christian Solidarity Worldwide) აქტივისტი ენდრიუ ჯონსტონი. როგორც აღნიშნავს კათოლიკე მღვდელი მარკუს მანურანგი, სუმატრაზეც ხშირია რელიგიური ნიშნით დისკრიმინაცია, რომლის მსხვერპლნი სხვადასხვა კონფესიის ქრისტიანები ხდებიან. ზოგიერთ დასახლებაში მათ ღმრთისმსახურებაც კი ეკრძალებათ.

**ტანზანია.** კუნძულ ზანზიბარის ქრისტიანები ამაოდ ცდილობენ სამართლის აღდგენას: ადგილობრივი სამართალდამცავები არავითარ ზომებს არ იღებენ სამლოცველოთა დანგრევის ფაქტების გამოძიებისათვის. ადგილობრივ ქრისტიანულ თემთა მეთაურები მიიჩნევენ, რომ ხელისუფლება განგებ ხუჭავს თვალს ქრისტიანთა დარბევებისა და სამლოცველოების დანვა-დანგრევის ფაქტებზე.

## ეგვიპტის პრეზიდენტი კათოლიკე ეპისკოპოსებს შეხვდა

27 ივნისს, ეგვიპტის ახლად არჩეული პრეზიდენტი, მუჰამედ მურსი ქვეყნის კათოლიკე მღვდელმთავრებს შეხვდა.

„კარგი ნიშანია, რომ შეხვედრა თავად პრეზიდენტის ინიციატივით შედგა. მას სურდა, პირადად შეხვედროდა მღვდელმთავრებს, რათა თანამშრომლობისთვის მზაობა გამოეჩინა“, – აღნიშნა ეგვიპტის ეპისკოპოსთა კონფერენციის პრეს-მდივანმა მამა რაფიკ გრეხიმამ.

საარჩევნო კამპანიის დროს, მუჰამედ მურსიმ არაერთხელ აღნიშნა, რომ სურს გახდეს „პრეზიდენტი ყველა ეგვიპტელისთვის“ და არა მხოლოდ მუსლიმთათვის.

## ოკეანედან ოკეანემდე

14 ივნისს დაიწყო 18 ქვეყნის კათოლიკე და მართლმადიდებელ მორწმუნეთა ერთობრივი მსვლელობა ჩესტოხოვის ღმრთისმშობლის ხატიით. ეს ზუსტი ასლია იმ ხატისა, რომლის მოსალოცად მრავალი მორწმუნე ჩესტოხოვში, იასნა გორას მონასტერში მიდის. „ოკეანედან ოკეანემდე“ მსვლელობა სიცოცხლისა და ოჯახის დასაცავად სრულდება. 18 000 კილომეტრიანი მარშრუტი, რომელიც ვლადივოსტოკში დაიწყო და ფატიმაში დასრულდება, 23 ქვეყანას მოიცავს: რუსეთი, უკრაინა, ბელარუსი, ლატვია, ლიტვა, პოლონეთი, ჩეხეთი, სლოვაკეთი, უნგრეთი, რუმინეთი, სლოვე-



ნია, ხორვატია, იტალია, ავსტრია, ლიხტენშტეინი, შვეიცარია, გერმანია, ბელგია, დიდი ბრიტანეთი, ირლანდია, საფრანგეთი, ესპანეთი, პორტუგალია. ფატიმაში მისვლას ორგანიზატორები შობისთვის გეგმავენ. მსვლელობის ერთ-ერთმა კოორდინატორმა, ორგანიზაციის Human Life International პოლონეთის განყოფილების დირექტორმა ევა კოვალევსკამ აღნიშნა, რომ 2013 წელს იგეგმება ჩესტოხოვის ხატის გადატანა აშშ-ში, სამხრეთ ამერიკაში, აფრიკასა და ავსტრალიაში. „უდიდესი მნიშვნელობა აქვს იმ ფაქტს, რომ ამ მოვლენამ კათოლიკე და მართლმადიდებელი მორწმუნეები გააერთიანა. მსვლელობის მანძილზე ხატი როგორც კათოლიკურ, ასევე მართლმადიდებლურ ტაძრებში განთავსდება“.

## რომის კატაკომბების რესტავრაციას ჰეიდარ ალიევის ფონდი დააფინანსებს



22 ივნისს რომში წმიდა საყდარსა და ჰეიდარ ალიევის ფონდს შორის შედგა შეთანხმება ქრისტიანული სინმიდისა და რომის ისტორიული ძეგლის, პეტრესა და მარცელინოს III საუკუნის კატაკომბების რესტავრაციის შესახებ. შეთანხმებას ხელი მოაწერეს წმიდა არქეოლოგიის პონტიფიკალური კომისიის თავმჯდომარემ კარდინალმა ჯანფრანკო რავაზიმ და აზერბაიჯანის პირველმა ლედიმ, ჰეიდარ ალიევის ფონდის პრეზიდენტმა მეჰრიბან ალიევამ.

„ქვეყანამ, რომლის მოსახლეობის უდიდესი ნაწილი მუსლიმია, გულუხვი მზაობა გამოიჩინა. ეს გადაწყვეტილება ძალზე მნიშვნელოვანია ჩვენთვის. იგი ხელს შეუწყობს ინტერკულტურულ ურთიერთობებს და გააღრმავებს რელიგიათა შორის დიალოგს“, – აღნიშნა კარდინალმა.

## კულტურის პონტიფიკალური საბჭოს ახალი განყოფილება

14 ივნისს გაიმართა კულტურის ახალი განყოფილების, – „კულტურა და სპორტი“, – პრეზენტაცია. საბჭოს თავმჯდომარემ კარდინალმა ჯანფრანკო რავაზიმ აღნიშნა, რომ სტრუქტურის მიზანი სპორტის ფენომენისადმი ახლებური მიდგომის შემუშავებაა: სპორტი ერთ-ერთი იმ სფეროთაგანია, სადაც უნდა წარიმართოს დიალოგი ეკლესიასა და კულტურას, ეკლესიასა და ახალგაზრდობას, ასევე მორწმუნეთა და არამორწმუნეთა შორის. „მანამ, სანამ შევუდგებით დიალოგს სპორტის სამყაროსთან, უნდა გავიცნოთ იგი. ეკლესიამ უნდა გაიგოს სპორტის სამყაროს მისწრაფებები და ეძიოს დიალოგის გზები მის გმირებთან.“

## წმიდა საყდარი ბოშათა ინტეგრაციისთვის ზრუნავს

19 ივნისს უნგრეთის ქალაქ ეგერში, უნგრეთის ეპისკოპოსთა კონფერენციის ინიციატივითა და ორგანიზაციის Renovabis-ის ხელშეწყობით, გაიმართა საერთაშორისო სემინარი, რომელიც ევროპაში ბოშათა ინტეგრაციის პრობლემას მიეძღვნა. „ბოშათა უმრავლესობა გაუსაძლის პირობებში ცხოვრობს, წყალგაყვანილობისა და ელექტრომომარაგების გარეშე. კიდევ ერთი მნიშვნელოვანი პრობლემა სამედიცინო მომსახურების მიუწვდომლობაა. სიცოცხლის დონის ამაღლებისთვის ბოშებს ევროპის ქვეყნების დახმარება სჭირდებათ. ამავე დროს, უნდა გავითვალისწინოთ და პატივი უნდა ვცეთ მათ კულტურულ თავისებურებებსა და ტრადიციებს. ინტეგრაციის პროცესი თითოეული მათგანის ღირსებისა და უფლებათა აღიარებას გულისხმობს“, – აღნიშნა ემიგრანტთა და მოგზაურთათვის ზრუნვის პონტიფიკალური საბჭოს წარმომადგენელმა მამა გაბრიელე ბენტოლიომ.

## მომავალი შიმშილის გარეშე

1-2 ივნისს, ვენაში საერთაშორისო საქველმოქმედო ორგანიზაციის Caritas Internationalis



ინიციატივით, გაიმართა კონფერენცია „მომავალი შიმშილის გარეშე“. „შიმშილს საფუძვლად სოციალური, ეკონომიკური და პოლიტიკური მიზეზები უდევს. ჩვენ ვთხოვთ ეკონომიკურად ძლიერ ქვეყნებს, მოახდინონ ძალთა მობილიზაცია მსოფლიოში შიმშილის პრობლემის გადაწყვეტისთვის. ნუ დაგვაგინყდება, რომ ყოველ 12 წამში მსოფლიოში შიმშილისგან ბავშვი კვდება“, – განაცხადა ჰონდურასის კარდინალმა როდრიგეს მარადიამამ.

## დედოფლობის 60 წელიწადი



ბო წერილში უწმიდესმა პაპმა აღნიშნა, რომ ელისაბედ II წარმოადგენს „თავისუფლების, სამართლიანობისა და დემოკრატიის პრინციპების ერთგულების მაგალითს“. ბენედიქტე XVI-მ გაიხსენა თავისი 2010 წლის ვიზიტი დედოფლის ედინბურგის რეზიდენციაში და კიდევ ერთხელ გადაუხადა მადლობა მას-პინძლობისთვის.

მოამზადა რუსუდან ავალიშვილმა



# დაუპიწყარი და უმთავრესი დღე წეროვანში



16 ივნისი მართლაც დაუვინყარ დღედ დარჩება ყველასათვის, ვინც წეროვანში მეუფე ჯუზეპეს ინიციატივით მოწყობილ შეხვედრასა და მსახურებაში მიიღო მონაწილეობა. წლევედელი წელი განსაკუთრებულად მნიშვნელოვანია საქართველოში მოღვაწე ექვსი მღვდელ-მსახურისათვის. მათ, მართალია, სხვადასხვა დღეს, მაგრამ ამ წელს შეუსრულდათ ხელდასხმის საიუბილეო თარიღი და ეპისკოპოსის სურვილით გადაწყდა, წეროვანში საკრებულოებს ერთად აღენიშნათ ეს თარიღი.

**მამა ანდრეი იანიცკი** 1987 წელს ჩამოვიდა თბილისში. იმხანად სემინარია ახალი დამთავრებული ჰქონდა და, მამა იან სნეჟინსკის მოწვევითა და საქართველოს ხელისუფლების ნებართვით, ჯერ რამდენიმე თვე თბილისში, შემდეგ კი სხვილისში მსახურობდა მამა იოსებ კორნაშევსკისთან ვიკარიუსად. როდესაც ხელისუფლებისა და პატრიარქ ილია II-ის შუამდგომლობით რეგისტრაციაში გატარდა ახალქალაქის რ-ნის სოფ. ტურცხის კათოლიკური ეკლესია, მამა ანდრეი წინამძღვრად გადაიყვანეს და 24 წელია, იქ ეწევა მსახურებას. **მამა ანატოლი** ჯერ კიდევ საბჭოთა ხელისუფლების დროს ჩამოვიდა საქართველოში და ახალციხის წყალთბილას ახლად გახსნილ ეკლესიაში დაიწყო მსახურება. მათ სულ მალე შესანიშნავად შეისწავლეს სომხური ენა, სომხურ წესზე გადავიდნენ და ადგილობრივი მრევლის დიდი სიყვარული დაიმსახურეს. სწორედ მამა ანდრეისა და მამა ანატოლის უდიდესი დამსახურებაა, რომ, 50-წლიანი ინტერვალის შემდეგ, აღდგა სომხური კათოლიკური წესის ეკლესია საქართველოში.

**მამა ადამ ოხალს** სპეციალური წარდგენა არ სჭირდება. თავისი 35-წლიანი სამღვდლო მსახურებიდან 20 წელი თბილისში გაატარა, წმ. პეტრე და წმ. პავლე მოციქულთა ტაძრის წინამძღვრად. მისი უშუალო მონაწილეობით, მსახურებითა და ფიზიკური შრომით აღდგა გორისა და ახალციხის საკრებულოები ქართლში. ასევე, კახეთის ხუთივე საკრებულოს მისი უდიდესი ამაგი ატყვია. მამა ადამი არის ნეოკატეხუმენური საკრებულოს ხუცესიც.

**მამა ანჟეი გრაჩესკაც** არ სჭირდება განსაკუთრებული წარდგენა. მან მეოთხედი საუკუნის წინ მიიღო ხელ-

დასხმა პოლონეთში და 14 წელია საქართველოში მსახურობს. ბოლო რამდენიმე წელია, თბილისის კათედრალის წინამძღვარია და თან ნეოკატეხუმენური საკრებულოს ხუცესი.

**მამა პიერ დიუმულენი** ათ წელზე მეტია, რაც საქართველოში მოღვაწეობს, ეწევა როგორც ღვთისმსახურებას, ასევე ფართო აღმზრდელობით საქმიანობას. ძნელია მისი ღვაწლის ასე მოკლედ შეფასება, მაგრამ რასაც აკეთებს, ძალზე მნიშვნელოვანია ახალგაზრდა მორწმუნეთა ფორმაციისათვის. იგი სულხან-საბა ორბელიანის სასწავლო უნივერსიტეტის პროფესორია. პარალელურად პედაგოგიურ საქმიანობას ეწევა რამდენიმე ქვეყნის სემინარიაში. ერთ-ერთი ცნობილი ეგზეგეტიკაა და, საქართველოში ყოფნის დროს, თბილისში, ქუთაისსა და ახალციხეში ბიბლიის შემსწავლელ კურსებს უძღვეს. არის სულხან-საბა ორბელიანის საგანმანათლებლო საზოგადოების დამფუძნებელი და ხელმძღვანელი და მრავალი სასიკეთო წამოწყების სულისჩამდგმელი. მისი აქტიური დახმარებით 2005 წლიდან თბილისში ტარდება საერთაშორისო სიმპოზიუმები რელიგიათმცოდნეობასა და ბიოეთიკაში. და მოკლედ თუ ვიტყვით, მამა პიერი ყველასათვის ძალზე, ძალზე საყვარელი ადამიანია.

მისი მაღალყოვლადუსამღვდელოესობა მთავარეპისკოპოსი **მარეკ (მარკოზი) სოლჩინსკი** 2012 წლიდან ვატიკანის სრულუფლებიანი დესპანია საქართველოში. უშუალო დიპლომატიური საქმიანობის გარდა, ცდილობს, ადგილობრივი კათოლიკური საკრებულოების ცხოვრებაში მიიღოს მონაწილეობა და, საჭიროების შემთხვევაში, აქტიური მხარდაჭერაც აღმოუჩინოს.

წეროვანში დღის 12 საათისათვის ღია საკურთხევის ირგვლივ შეკრებილ საქართველოს სხვადასხვა საკრებულოების წარმომადგენლებს ეპისკოპოსმა ჯუზეპე პაზოტომ მიმართა მოკლე წარდგინებით. შემდგომ უკვე მთავარეპისკოპოსმა მარეკმა და მასთან თანაზიარებაში შეკრებილმა სამღვდლო დასმა წმინდა წირვა აღავლინა. ქადაგებისას (იხ. ქვემოთ) მეუფე ჯუზეპემ შეკრებილ მრევლს მოკლედ გააცნო ამ ექვსი იუბილარი მღვდელმსახურის ღვაწლი და ისაუბრა მათი მოწოდე-

ბის მნიშვნელობაზე. წირვის დასრულების შემდეგ, ეპისკოპოსმა და საკრებულოების წარმომადგენლებმა მიულოცეს თავიანთ სულიერ მამებს ხელდასხმის საიუბილეო თარიღი, კათედრალის ახალგაზრდებმა იუბილართა პატივსაცემად პოლონური, ფრანგული სიმღერები და ცეკვები წარმოადგინეს. შემდგომ ეპისკოპოსმა ყველანი ღია ცის ქვეშ სადღესასწაულო ტრაპეზზე მიიწვია. ტრაპეზის დასრულებით არ დამთავრებულა ღონისძიება. კათედრალის ახალგაზრდებმა ახლა უკვე საბავშვო თოჯინების წარმოდგენა შემოგვთავაზეს. ბოლოს კი ეპისკოპოსმა, მისთვის ჩვეული თბილი იუმორით, იუბილარებს სთხოვა, საჯაროდ ეპასუხათ ქადაგების დროს დასმულ კითხვებზე: გაეხსენებინათ, თუ რამ განაპირობა მათი მოწოდება... მსმენელისათვის მართლაც საინტერესო და შთამბეჭდავი იყო მამების მიერ გახსენებული სიჭაბუკის წლები და ფაქტები, რამაც უბიძგა მათ სამღვდლო სამსახურისაკენ.

მაგალითად, მთავარეპისკოპოსი მარეკი ახალგაზრდობისას საქველმოქმედო სამსახურით იყო დაკავებული სამრევლოში, შემდეგ სასულიერო სემინარია დაასრულა და სამი წელი ვიკარიუსად მსახურობდა, მისი მოძღვრის რჩევით, ვატიკანში დიპლომატიურ სასწავლებელში განაგრძო სწავლა და უკვე წლების მანძილზე სხვადასხვა



ქვეყანაში უხდება წმინდა საყდრის სადესპანოებში სამსახური.

მრავალშვილიან ოჯახში დაბადებულმა მამა ადამმა, პოლონეთში კომუნისტური რეჟიმის დროს, სარისკო საქმიანობა, მღვდელმსახურება აირჩია და, ათიოდე წლის შემდეგ, მისთვის უცხო მხარეში მოუწია გამგზავრება.

მამა ანჟეი ჯერ ინჟინრობას აპირებდა, დიდხანს ყოყმანობდა, მაგრამ ნეოკატეხუმენურ გზაზე ყოფნა დაეხმარა, ეპოვა თავისი მოწოდება.

მამა პიერი თავდაპირველად ექიმობაზე ოცნებობდა. ერთი წელი კიდევ სწავლობდა სამედიცინო სასწავლებელში, მაგრამ შემდეგ მიხვდა, რომ ფიზიკურ განკურნებაზე მეტად სულიერი განკურნება იყო აუცილებელი ადამიანებისთვის...

მართლაც ძალზე შთამბეჭდავი იყო იუბილარი მამების მოგონებები და ალბათ, იქ მყოფი ახალგაზრდების მოწოდებაზე გარკვეულ წარუშლელ კვალს დატოვებს.

ჩვენ კი, ამ საიუბილეო მსახურების მონაწილეებს, დიდხანს გაგვყვება მეუფე ჯუზეპეს მიერ ორგანიზებული ლამაზი და თბილი შეხვედრის შთაბეჭდილება და ის გამოცდილება, თუ როგორ უნდა გავეზიაროთ ერთმანეთს სიკეთე და სიხარული.

**ნუზუარ ბარდაველიძე**





## ეკისკოჯოსი ჯუბეჟე ჰაზოტო (ქადაგება)

თქვენო უწმინდესობავ, მამა მარეკ და ძვირფასო მღვდელმსახურნო: მამა ანდრეი, მამა პიერ, მამა ადამ, მამა ანდრეი და მამა ანატოლი, მოხარული ვარ, რომ თქვენს გვერდით ვიმყოფები, რათა ღმერთს მადლობა შევნირო თქვენი მღვდლობისათვის. თქვენთან ერთად, კიდევე ერთხელ „ავნევეთ ხსნის ბარძიმს და მოვუხმობთ უფლის სახელს“, როგორც არაერთხელ გავციკეთებია ამ წლების მანძილზე. თქვენთან ერთად ვიგალობებთ მარიამის სადიდებელს: „ადიდებს სული ჩემი უფალსა... დიდი საქმე მიყო ყოვლადძლიერმა, წმიდაა სახელი მისი“. სწორედ ეს არის ჩვენი დღევანდელი ექვარსტიული მსახურებისა და ერთად შეკრების მიზეზი.

თქვენთან ერთად აქ ყოფნა ყველა ჩვენგანისთვის სიყვარულის გამოხატულებაა. გვიყვარხართ და უფლის მადლიერნი ვართ იმისათვის, რომ ჩვენი მღვდელმსახურები ხართ, რადგანაც ღმერთისთვის თქვენი სიცოცხლის მიძღვნით, თქვენ ის ჩვენც მოგვიძღვენით! მადლიერნი ვართ უფლისა, რომ ჩვენთან მოგავლინათ მოძღვრებად. თქვენდამი მადლიერებასა და სიყვარულს გამოხატავენ ისინიც, ვინც დღეს აქ მოსვლა ვერ შეძლო.

ჩვენ არ ვიცით, როგორ დაიწყოთ თქვენი სამღვდელმსახურებო ისტორია, არ ვიცით, რა მოხდა თქვენს გულებში მრავალი წლის წინ... მაგრამ დარწმუნებულნი ვართ, რომ რაღაც დიადი მოხდა! თქვენი ცხოვრების რაღაც მომენტში იესომ პირადად გითხრათ: „ამათზე მეტად გიყვარვარ? მწყემსე ჩემი ცხვრები!“

თქვენო უწმინდესობავ, გახსოვთ, როდის გითხრათ იესომ ეს ფრაზა: „ამათზე მეტად გიყვარვარ?“ მამა პიერ, შენ სად იყავი იმ დღეს? მამა ანდრეი, შენ ელოდი ამ მოხმობას? მამა ადამ, მამა ანატოლი, რა გაიფიქრეთ, როცა გაიგონეთ: „მომყევი, მწყემსე ჩემი ცხვრები?“

ერთი სიტყვით, ცხადია, თითოეულ თქვენგანს განსხვავებული ის-



ტორია აქვს, თუმცა, დარწმუნებული ვარ, ყველა ეს ისტორია მსგავსი თარგით წარიმართა, ყოველ მათგანს ახასიათებდა ხანგრძლივი ძიება, მოლოდინი, ეჭვები, სრულიად წარმოუდგენელი მოულოდნელობები. მაგრამ, ალბათ, იტყვიან: „ერთი დღე იყო, სხვების მსგავსი. და იმ დღეს ის მოვიდა და მომიხმო.“ იმ დღეს მან აგაღელვათ, გული აგიჩქარათ, როცა პირისპირ წარსდგა თქვენს წინაშე და გაგაოგნათ მწვავე შეკითხვით: „მარეკ, ანდრეი, პიერ, ადამ, ანდრეი, ანატოლი... გიყვარვარ?“

იესოს ეს მოხმობა შემდეგ ეკლესიის მოხმობად იქცა, რომელიც გვერდში გედგათ მომზადების პოცესში და რომელმაც მიგიყვანათ თქვენი ხელდასხმის დღემდე, როცა ეპისკოპოსისადმი ნათქვამი თქვენი „დიახ, მსურს“, ხელდასხმის ძალით, „წარგზავნად და მისიად“ იქცა. ეკლესიამ ნდობით მიგავლინა თქვენი.

თქვენი ამ საიუბილეო თარიღის სახსოვრად, მსურს, რამდენიმე სიტყვა მოგიძღვნათ სახარებიდან, რომელიც ახლა მოვისმინეთ:

1. პირველი სიტყვაა „დარჩენა“. ერთგულება. „ვინც ჩემში დარჩება, ხოლო მე – მასში, ბევრ ნაყოფს გააძლიერებს“. ტექსტის ამ ფრაგმენტში სიტყვა „დარჩენა“ შვიდჯერ გვხვდება, ხოლო იმ დღიდან, როცა ანდრია და იოანე იესოს იორდანეს ნაპირზე შეხვდნენ („და მთელ დღეს მასთან დარჩნენ“), – „დარჩენა“ განსაკუთ-

რებული ზმნაა, რომელიც გასდევს იესოსა და მისიანებს შორის დამყარებულ სასიცოცხლო კავშირს და მოგვითხრობს მის შესახებ. და ამიერიდან და სამუდამოდ ყველაფერი დამოკიდებულია ამ შინაგან და ურთიერთდამოკიდებულ კუთვნილებაზე: იესო უნდა დარჩეს მოწაფეებში, მოწაფეები – იესოში, ყველა ერთად კი მამა ღმერთის კალთაში უნდა დარჩეს.

ხალხთა მოციქულის სიტყვებით თუ ვიტყვით, იოანესეული „დარჩენა“ შეიძლება ვთარგმნოთ პავლესეული ტერმინით „სარწმუნო“, ანუ ერთგული: „და უფრო მეტიც, მნეთა შორის ეძებენ, რომ აღმოჩნდეს სარწმუნო ვინმე“ (1კორ. 4,2). მოწაფისა და, უფრო მეტად, მოძღვრის ერთგულება არ არის სიჯიუტე, კეთილშობილური პრინციპების თავდადებული დაცვა, ან სიძნელეების, გამოცდებისა და საშიშროების წინაშე სტოიკური სიმტკიცით დგომა. ეს მამა ღმერთის იდუმალებით მოცული ჩანაფიქრის სიყვარულით აღსავსე, წვალებით მიღწეული მიღებაა. მოციქულის სიდიადის საზომი განსაცვიფრებელი გენიალურობა, მიქეფარე შემოქმედებითობა, ან დაუოკებელი აქტივობა კი არ არის, არამედ მოწაფის მადლიერი, მშვიდი, დაუღალავი მონდომება. ეს არის ერთგულება დღიდან დღემდე!

ძვირფასო ძმებო, სიცოცხლის მიწურულს არ გკითხავენ, ტაძრის სახურავიდან გადმოხტომით თუ

განაცვიფრეთ მაყურებელი, ან სასწაულებრივად თუ გარდაქმენით ოქროდ ქვა. თქვენ გკითხავენ, იყავით თუ არა ერთგულნი – განიცადეთ თუ არა მრავალი სათნოების ეს პირმშო. თქვენ გკითხავენ, სადაც დღეებში აქციეთ თუ არა ის: მიცემული სიტყვისადმი ერთგულებად, სიმტკიცედ განსაცდელში, მოთმინებად წინააღმდეგობისას, ურყეობად ყოველდღიურ მსახურებაში, დაუღლელ გულუხვობად, თქვენი მორწმუნეებისათვის ღმერთისადმი ლოცვაში გატარებულ დროდ. თავის სამწყსო წერილებში წმ. პავლე მრავალგზის ჩამოთვლის ამ სათნოებებს და გვიჩვენებს, მსახურებისათვის არჩეულებში დავაკვირდეთ მათ.

2. მეორე სიტყვაა ძმობა. „გიყვარდეთ ერთმანეთი, როგორც მე მიყვარხართ“, – ეს იესოს ახალი მცნებაა. ძმური სიყვარული ყველაზე მკაფიო და უდავო საბუთია, რომლის მოტანაც შეუძლია მწყემსს თავისი მსახურების უეჭველობის სასარგებლოდ. ვაზის ერთი ყლორტი ვერ მოითხოვს ექსკლუზიურ უფლებას წვენზე, რომელსაც ვაზისგან იღებს. ყველა ყლორტი იგივე წვენით საზრდოობს. ყლორტს არ მოეთხოვება, იყოს ერთადერთი, ყველაზე მშვენიერი ან ძლიერი, მას მოეთხოვება ერთგულება: ის ყველა სხვა ყლორტთან ერთად არის დაკავშირებული ვაზთან. ხოლო სახარების ყველა მსახურის ძმობა, მათ ეპისკოპოსთან ერთად, ბუნდოვანი და უსაგნო გრძნობა როდია: ეს არის

„საიდუმლოებებზე დაყრდნობილი შინაგანი ძმობა“ (P0, 8). ეს არის ეკლესიის დამომწმენელი ძალა! მისი შედეგი ცხადია: წმ. გრიგოლ დიდი წერს: „ვისაც ძმური სიყვარულის გამოცდილება არა აქვს, სახარების გაცხადება არ უნდა გაბედოს“ (ქადაგებები, 17, 1-3).

ძვირფასო ძმებო, თუმცა, კარგად მოგხსენებათ ეს, რადგანაც ამ წლების მანძილზე ისწავლეთ, მაგრამ არასდროს დაივიწყეთ: პირველი ნიჭი, რომელსაც საქართველოში ადამიანებს, ან კათოლიკე საკრებულოს უძღვნით, არის არა საქმიანობა, როგორი უხვი და დაუღლელიც არ უნდა იყოს ის (და, მით უმეტეს, არა გაშმაგებული აქტივიზმი, რომელიც უფრო შენსკენ იპყრობს ყურადღებას, ვიდრე ეკლესიისკენ...), არამედ მღვდელმსახურთა შორის ძმობა, კონკრეტულად განცდილი, მოთმინებითა და რუდუნებით მოვლილი, დაცული ყოველგვარი ჩაკეტილობისგან. როცა ერთი ეკლესიის მღვდელმსახურები თანაზიარებას არღვევენ, ეს საშინელება მათთვის და ეკლესიისთვის! თითოეულშია ცდუნება (რომელიც წლების მანძილზე შეიძლება გაძლიერდეს), მოიწყოს საკუთარი ბოსტანი, იმუშაოს, თუმცა ენთუზიაზმით, მაგრამ შეზღუდულად, იმის შერჩევით, რაც პირადად მას მოსწონს, წარმოაჩენს, ან აკმაყოფილებს მას. მაგრამ სახარების გავრცელება ერთობლივად არის საქირო და არა ცალ-ცალკე. გახსოვდეთ, იესომ ორ-ორი მოციქული წარგზავნა.

3. მესამე სიტყვა: ნაყოფიერება. ნუ გეშინიათ: თქვენი ცხოვრება უკვე ნაკურთხია, თქვენ უკვე გამოიღეთ ნაყოფი და კიდევე მრავალ ნაყოფს გამოიღებთ. როგორც ამ ეკლესიის ეპისკოპოსს, მსურს, მადლობა გადაგიხადოთ.

გმადლობთ ყოველი ჯერისათვის, როცა თქვით: „აიღეთ და ჭამეთ“ და ყოველი ჯერისათვის, როცა თქვით: „ნადი მშვიდობით, ცოდვები შეგენდო“, ყოველი ჯერისათვის, როცა თქვით: „ეს უფლის სიტყვაა“. გმადლობთ ყოველი ჯერისათვის, როცა ცოცხალი საიდუმლოები იყავით და ამგვარად გააგრძელებთ იესოს მისია. მხოლოდ სიცოცხლის ბოლოს შევძლებთ იმის გაგებას, თუ რამდენი დიადი რამ მოიმოქმედა უფალმა ჩვენი მეშვეობით. სწორედ ის მოქმედებს. შესაძლოა, იმასაც მივხვდეთ, რომ წვალება, გაუგებრობა, იმედგაცრუება, დაღვრილი ცრემლი, ძალით და მორჩილება იესოს ჯვრის სხვა სახელები იყო, რომლებიც მან დაირქვა, რათა ყოფილიყო ხსნა ჩვენთვის და სხვებისათვის.

ღვთის დედა გილიმოდეთ და გფარავდეთ მუდამ; წმიდა გიორგი, წმიდა ნინო და ყველა წმიდანი, რომელსაც საქართველოს მიწაზე დაუდგამს ფეხი და ყველა მღვდელმსახური, რომელმაც აქ თქვენამდე იღვანა, იყოს თქვენი თანამგზავრი და შემწე თქვენს სამღვდელმსახურებო გზაზე. გისურვებთ, ეს გზა იყოს გრძელი და მშვენიერი, მთელი ჩვენი ეკლესიის სასიხარულოდ.

დასასრულს, პავლე VI-ს სიტყვებს მოვიყვან: „ძვირფასო მღვდელმსახურებო, სასწაულს გთხოვთ! გაოცებას გთხოვთ! მე, მღვდელმსახური, უნდა ვიყო აღტაცებისათვის, განცვიფრებისათვის, მოხიბვლისათვის მუდამ მზადმყოფი სული. და ყოველივე ძველი, რაც მრავალი წლის მანძილზე აღმისრულებია და შემიცვნიდა, ყოველდღე ახლად უნდა მომეჩვენოს“.

ვინც გაოცდება, განცვიფრდება, მოიხიბლება, მუდამ ახალგაზრდა რჩება! მუდამ ახალგაზრდები იყავით!

ნაოვანი,  
2012 წლის 16 ივნისი







ქრისტიანული მომლოცველობის ტრადიცია უძველესი დროიდან იწყება. თამამად შეიძლება ითქვას, რომ მის სათავეებთან პირველი საუკუნეების ქრისტიანები დგანან. 313 წელს კონსტანტინე დიდის მიერ ქრისტიანობის ოფიციალურად აღიარებისა და მაცხოვრის ამქვეყნიურ ცხოვრებასთან დაკავშირებულ ადგილებზე ტაძრების აგების შემდგომ, დიდ მნიშვნელობას იძენს სახარებისეული ადგილების თუნდაც ცხოვრებაში ერთხელ მონახულება. IV საუკუნის პირველ ნახევარში იერუსალიმის ეპისკოპოსის წმ. კირილე იერუსალიმელის ქადაგებებში დიდი ადგილი ეთმობა წმინდა ადგილის ხილვისა და მომლოცველობის მნიშვნელობას. ამავე საუკუნეში იქმნება წერილობითი ძეგლები იერუსალიმისა და სხვა ადგილების მომლოცველობის შესახებ. პირველები, ვინც წერილობითი ცნობა შემოგვინახეს ქრისტიანული სინმინდეების მომლოცველობის შესახებ, არიან IV საუკუნის I ნახევრის ანონიმი მომლოცველი ბორდოდან და დიდგვაროვანი ქალბატონი გეგ-რია. მათი დღიურები, ფაქტობრივად, სახელმძღვანელო გახდა შემდგომი საუკუნეების მილიონობით მომლოცველისათვის, რომლებიც, საფრთხეების მიუხედავად, მიეშურებოდნენ (და ეს მოგზაურობა ძირითადად ფეხით ხორციელდებოდა) წმინდა მიწისკენ. თანდათანობით მომლოცველობის გეოგრაფია ფართოვდებოდა და მასში, იერუსალიმის გარდა, წმინდა წერილებში დასახელებული სხვა მრავალი ადგილიც შევიდა.

მომლოცველობაში ადრეული საუკუნეებიდანვე მონაწილეობდნენ ქართველებიც. ერთ-ერთ მომლოცველად შეიძლება შოთა რუსთაველიც კი მოვიაზროთ. გასული საუკუნის 90-იანი წლებიდან, როცა სრული ძალით ამოქმედდა საქართველოში კათოლიკე ეკლესია და კურიაც შეიქმნა, მომლოცველობის პრაქტიკა, მეუფე ჯუზეპესა და სხვა მღვდელმსახურთა ინიციატივით, აქტიურ ფაზაში შევიდა. ქართველმა კათოლიკეებმა, მათთან ერთად კი მართლმადიდებელმა მორწმუნეებმაც, არაერთი მომლოცველობა განახორციელეს, როგორც საქართველოში, ასევე წმინდა მიწაზე და სხვა სახარებისეულ ადგილებშიც.

ქრისტიანული მომლოცველობის გეოგრაფიაში მნიშვნელოვანი ადგილი უკავია დღევადელ თურქეთის რესპუბლიკას. ეს არცაა გასაკვირი, რადგან ეს სახელმწიფო თავის საზღვრებში მოიცავს მრავალ ადგილს, რომელიც პირველ ქრისტიანობას უკავშირდება.

კაბადოკიას, რომელიც მილიონობით ადამიანისათვის საოცნებო ადგილს წარმოადგენს, ეპისკოპოს ჯუზეპე პაზოტოს ინიციატივით, რამდენიმე წლის წინ ეწვია მომლოცველთა პირველი ჯგუფი. კაბადოკიის მონახულების მსურველები კი

მრავლად იყვნენ, ამიტომ, მამა გაბრიელე ბრაგანტინის ინიციატივით, მიმდინარე წლის მაისის ბოლოს, კვლავ გაეშურა თურქეთისაკენ საქართველოს სხვადასხვა კუთხეში მცხოვრები კათოლიკე და მართლმადიდებელი ქრისტიანებით დაკომპლექტებული მომლოცველთა ახალი ჯგუფი. მომლოცველთა ამ ჯგუფს, მამა გაბრიელესთან ერთად, მეგზურობას უწევდა მამა პიერ დიუმულენი.

ქართველ მომლოცველთა მასპინძლობა ითავა ეფესოში მოქმედმა კაპუცინთა ორდენის საძმომ, რომელმაც ნაწილობრივ თავის თავზე აიღო მომლოცველობის დაფინანსება და ორგანიზება.

მომლოცველთა ორმოცდაოთხკაციანი ჯგუფი თბილისის, გორის, მესხეთის, ქუთაისისა და ბათუმის საკრებულოებიდან დაკომპლექტდა. მასში, როგორც აღენიშნეთ, იყვნენ მართლმადიდებელი და პროტესტანტი მორწმუნეებიც, რაც კიდევ ერთხელ უსვამს ხაზს იმას, რომ ქრისტიანებისათვის მომლოცველობაში მონაწილეობას ხელს არ უშლის კონფესიური განსხვავებები.

25 მაისს, სარფის გამშვები პუნქტის გადაკვეთის შემდგომ, ანკარამდე 1300 კილომეტრიანი მონაკვეთი ჟამნისა და სავარდის ლოცვებით შეუმჩნევლად გავიარეთ. კაპუცინთა ორდენის საძმომ გაითვალისწინა ეფესომდე ხანგრძლივი გზის მთელი სიძნელე და ანკარაში ერთი ღამით კომფორტულ სასტუმროში შესვენების საშუალება მოგვცეს.

26 მაისს მომლოცველთა ჯგუფი უკვე ძველ ეფესოში ჩავიდა. დღეს ეს უძველესი და უმთავრესი ანტიკური ქალაქი, რომელიც პავლე მოციქულის დროს ეგეოსის ზღვის უპირველეს ნავსადგურს წარმოადგენდა, ზღვიდან უკვე 20 კილომეტრით არის დაშორებული და მის ადგილზე აგებული თანამედროვე ქალაქის სახელიც – სელჩუკია, მაგრამ ეს ხელს არ უშლის მილიონობით ტურისტს, ყოველწლიურად რამდენიმე დღით ესტუმროს ამ მხარეს. სანახავი კი მართლაც უამრავია: ანტიკური ეფესოს ნანგრევები, გრანდიოზული ამფითეატრი და მარმარილოთი მოკირწყლული ქუჩები, რომელთაც ახსოვთ წმ. პავლე მოციქუ-ლი, იოანეს სამარხი და მასზე აგებული უძველესი საკურთხევე-ლის ნაშთები, შვიდი მძინარე ჭაბუკის აკლდამა, უძველესი ტაძრების ნაშთები და ეფესოს მთავარი სასწაული – წმინდა მარიამ ღვთისმშობლის სახლი, სადაც იგი, იერუსალიმის დატოვების შემდგომ, წმ. იოანე მოციქულის დახმარებით ცხოვრობდა და საიდანაც ზეცად იქნა აღყვანილი კაცობრიობის წმინდა დედა.

ეფესოში წმ. მარიამის სახლი XIX საუკუნის ბოლოს აღმოაჩი-ნეს, XVIII საუკუნის გერმანელი წმიდანის, მარი ემერიჰის ხილ-

ვებში აღწერილი მინიშვნებების მიხედვით. კაპუცინთა ორდენის ბერებმა XIX საუკუნის ბოლოს შეიძინეს ეს ტერიტორია, აღად-გინეს წმ. მარიამ ღვთისმშობლის სახლი და ახლა, ამ წმინდა ად-გილს წელიწადში ორი მილიონი მომლოცველი სტუმრობს. ორი მილიონიდან ნახევარი ქრისტიანია და ნახევარიც მუსლიმი. მუსლიმებისთვის ასევე მნიშვნელოვანია წმ. მარიამის სახლის მონახულება. წმ. მარიამს, წინასწარმეტყველ იესოს დედას, ხომ ყურანში ცალკე თავი ეთმობა და ყოველი მუსლიმისთვის სათაყვანებელ ქალბატონს წარმოადგენს „მარიამ ანა“.

სალამოს, ეფესოდან 20-ოდე კილომეტრის დაშორებით მდე-ბარე ზღვისპირა ქალაქ კუშადასში დავბინავდით და შეღამე-ბულზე ვესტუმრეთ მარიამის სახლს, სადაც ჩვენი მასპინძელი კაპუცინი მამები ცისკრის მსახურების აღსავლენად ემზადე-ბოდნენ. მსახურებას, იტალიელი და ინგლისელი მორწმუნე-ების გარდა, თურქეთის სხვადასხვა ქა-ლაქების კათოლიკური საკრებულოების წევრი მომლოცველებიც ესწრებოდნენ. ამიტომ ლოცვებიც თურქულ, იტალიურ, ინგლისურ, ქართულ და საყოველთაო ლათინურ ენაზე აღევლინებოდა. ცისკ-რის ლოცვაში, კაპუცინ ბერებთან ერ-თად, მამა გაბრიელე და მამა პიერიც მონაწილეობდნენ.

ლოცვები ჯერ ღია ცის ქვეშ, ბაპტის-ტერიუმთან დაიწყო, შემდეგ ასეულო-ბით მლოცველმა, ანთებული სანთლე-ბით ხელში, იტალიელ მომლოცველთა მგალობელი გუნდის თანხლებით, წმ. მა-რიამის წყაროსთან, შემდგომ კი ღვთის-მშობლის სახლის მახლობლად, ღია სა-კურთხეველთან გადაინაცვლა. ეს იყო მართლაც დაუწინყარი ცისკრის მსახუ-რება, რომელზეც იესო ქრისტეში გაერ-თიანებული სხვადასხვა ქვეყნის, ერისა და კულტურის წარმომადგენლები ერ-თად აღავლენდნენ ვედრებებს უფლისა და ქალწული მარიამისადმი.

მდიდარი შთაბეჭდილებებით აღსაე-სენი დავბრუნდით სასტუმროში, რათა მეორე დღით სულიწმინდის მოფენის დღესასწაული ერთად აღგვენიშნა წმ. იოანეს სამარხზე აგებულ ტაძარში.

27 მაისს, დილიდანვე გავეშურეთ ძველი ეფესოს სიახლოვეს აგებულ თანამედროვე ქალაქ სელჩუკში. ქალაქის ციტადელი, რომელსაც ოსმალთა დროინდელი ციხე-სიმაგრე აგვირგვი-ნებს, III-VIII საუკუნეების ეფესოს ნაქალაქარს მოიცავს. დღეს აქ თურქეთის რესპუბლიკის სამუზეუმო ცენტრია, სადაც გან-საკუთრებულ დღეებში კათოლიკე ქრისტიანებს ნებას რთა-ვენ, ალაველინონ წმ. წირვები მოციქულ იოანეს საფლავზე. ჩვე-ნი მომლოცველობის ორგანიზატორებმა ისე დაგვემეს ვიზიტი თურქეთში, რომ საშუალება მოგვეცა, წმ. იოანეს სამარხზე აგებულ საკურთხეველთან წმ. წირვის აღსრულებას დავსწრე-ბოდით. წირვას იზმირის ეპარქიის მმართველი, მთავარეპის-კოპოსი რუჯერო ალაველნდა, მასთან ერთად კაპუცინთა ორ-დენის საძმო, თურქეთში (იზმირისა და ანკარის ეპარქიებში) მოღვაწე კათოლიკე მღვდლები და მამა გაბრიელე და მამა პიერი იღებდნენ მონაწილეობას. წირვის შემდგომ, საშუალება მოგვეცა, გულუხვი მასპინძლობისათვის გულწრფელი მად-ლობა გადაგვხადა მთავარეპისკოპოსისა და „მარიამ ანას“ საკრებულოს კაპუცინი მამებისათვის. წირვის შემდგომ, კა-

პუცინთა საძმომ ყველა სტუმარი სადღესასწაულო ტრაპეზზე მიგვიანვია, შემდგომ კი ანტიკური ეფესოს დასათვალიერებ-ლად გავეშურეთ, სადაც შეუდარებელ მეგზურობას გვინევდა მამა პიერი. მომლოცველობის მონაწილეები დამეთანხმებიან, რომ ეფესოს ნანგრევების გაცნობისას, ყველაზე შთამბეჭდა-ვი გახლდათ ამფითეატრის მონახულება, სადაც მამა პიერმა მართლაც შეუდარებელ სპექტაკლში ჩაგვითრია და პავლე მოციქულის ეფესოში გასამართლების ეპიზოდის ინსცენირე-ბის მონაწილეები გაგვხადა. პირადად ჩემთვის, როგორც რე-ლიგიის ისტორიკოსისათვის, მნიშვნელოვანი იყო იმ ტაძართა ნანგრევების მონახულება, სადაც ცნობილი ეფესოს მსოფლიო კრება გაიმართა.

28 მაისს, დღითი, კვლავ ვესტუმრეთ წმ. მარიამის სახლს, სადაც ქართულ ენაზე აღვავლინეთ სამადლობელი წირვა და კაბადოკიისაკენ მიმავალ გზას დავა-დექით. გზად უმშვენიერესი ადგილის, ძველი ჰიერაპოლისის (ახლანდელი პამუქკალეს) მონახულება გველოდა. გადმოცემის თანახმად, ჰიერაპოლისში დაკრძალულია მოციქული ფილიპე. მარ-თალია, ამ ძველი ელინური ქალაქის ნან-გრევები დღეს მუზეუმს წარმოადგენს და იქ ქრისტიანული მსახურების ჩარა-ტება კანონით არ არის ნებადართული, მაგრამ ათასობით მორწმუნე მიეშურება ქალაქ-მუზეუმის თავზე აღმართული ტაძრის ნანგრევებისაკენ, რათა პატივი მიაგონ იმ ადგილს, სადაც მოციქული ფილიპე და მისი ქალიშვილები არიან დაკრძალულნი.

ჰიერაპოლისიდან კარგად მოჩანს იოანეს გამოცხადებაში აღწერილი ქა-ლაქი ლაოდიკია, რომელიც „არც ცივი იყო და არც ცხელი“ და რომლის კარებ-ზეც აკაკუნებდა უფალი. დღეს ამ ქა-ლაქის ნანგრევებია დარჩენილი, ისევე როგორც იოანეს გამოცხადებაში აღწე-რილი აზიის სხვა ანტიკური ქალაქები.

ღამე პამუქკალეში დავყავით და 28 მაისს ძველი იკონიისკენ (ახლანდელი კონია) გავგეზვავრეთ. ქალაქი ანატოლიის ამალღებულ ზეგანზეა გაშენებული და მნიშვნელოვან ადმინისტრაციულ ცენტრს წარმოადგენს. XIII საუკუნეში სელჩუკთა კონიის სასულთანოს ცნობილი დედო-ფალი გახლდათ გურჯი ხათუნი, ბაგრატიონთა სამეფო საგ-ვარეულოდან. მისი დედოფლობის დროს, კონიაში, ვეზირ მეე-ლანას დროს, ჩაისახა და განვითარდა სუფისტური მისტიკური მოძრაობა, რომელიც თავისი სწავლებით ძალიან წააგავს ქრის-ტიანულ მოძღვრებას მოყვასის სიყვარულზე. მართალია, ქე-მალ ათათურქის ანტირელიგიური პოლიტიკის დროს, 30-იანი წლების დასაწყისში, სუფისტთა ორდენს აეკრძალა მოღვაწე-ობა, მაგრამ მუსლიმებისათვის კონია რჩება მათი რელიგიური რწმენის ერთ-ერთ მნიშვნელოვან ადგილად. თუმცა კონია, ანუ ანტიკური იკონია, პირველ რიგში, არის ქალაქი, რომელსაც პავლე მოციქული სტუმრობდა, ქალაქი, სადაც მრავალი წმინ-დანი და ეკლესიის მასწავლებელი მოღვაწეობდა.

კონიაში დღეს 1902 წელს აგებული კათოლიკური ეკლესია მოქმედებს. იგი ერთადერთი ტაძარია მთელ მხარეში. ტაძარს ამჟამად ორი მონაზონი პატრონობს. თვეში ერთხელ ანკარი-დან მოძღვარიც ჩამოდის, მუდმივი მრეველი კონიაში არ არის,



თუმცა ყოველ ოთხშაბათს ადგილობრივ მკვიდრთათვის, მათთვის, ვისაც აინტერესებს შეიტყოს ქრისტიანობისა და ეკლესიის შესახებ, ტაძარში ტარდება შეხვედრები. სახელმ-ნიფოში, სადაც ქრისტიანული მისიონერობა იკრძალება, ამგ-ვარი შეხვედრები ერთადერთი საშუალებაა, გააცნონ ქრის-ტეს მოძღვრება დაინტერესე-ბულ ადამიანებს.



კონიაში ყოფნის ერთი სა-ათი წმინდა წირვას მიუძღვენით, ლოცვებით შევავედრეთ უფალს თურქეთში მცხოვრები ქრისტიანები, ჩვენი კაპუცინი მასპინძლები, ასევე ჩვენი ეპისკოპოსი, რომელმაც გვთხო-ვა, მომლოცველობის დროს გველოცა მისთვის. წმ. წირვის შემდეგ, მასპინძელმა მონაზონმა მადლობა გადაგვიხადა სტუმრობისათვის, გულში ჩამწვდომი იყო მისი სიტყვები: „მართალია, ჩვენ აქ მუდმივი მოძღვარი არ გვყავს, მაგრამ გა-ზაფხულიდან ოქტომბრის ბოლომდე, თითქმის ყოველ კვირას და ისე დღეებშიც აქ უამრავი მომლოცველი ჩამოდის, მათთან ერთად მღვდლებიც და საშუალება გვაქვს, წირვები აღვას-რულოთ“. ადგილობრივი კანონების თანახმად, თუ არ იქნება სისტემატური მსახურება და ეკლესია უმოქმედოდ დარჩება, ხელისუფლებას უფლება აქვს, საერთოდაც დაკეტოს ტაძარი. მერე კი მისი ხელახალი ამოქმედება უკვე საერთაშორისო დო-ნეზეც კი შეიძლება ვეღარ გადაიჭრას. ისე, ინფორმაციისათ-ვის, დიდი ხანია, მიმდინარეობს მოლაპარაკება ვატიკანსა და თურქეთის რესპუბლიკას შორის, რამდენიმე ისტორიული ტაძრის ამოქმედების შესახებ. როგორც აღვნიშნეთ, თურქეთ-ში ზუსტად იმდენი კათოლიკეები ცხოვრობენ, რამდენიც სა-ქართველოში, – როგორც ხანგრძლივი მივლინებით მცხოვრე-ბი ევროპელები, ასევე ადგილობრივი მოქალაქეებიც. სულ კი თურქეთში ოთხი კათოლიკური ეპარქიაა, რამდენიმე ათეული ტაძარი და სამლოცველო სახლი. წარმატებით მოქმედებენ კა-თოლიკური საქველმოქმედო ორგანიზაციები და მისიები.

იკონიიდან კაზადოკიამდე შორი გზა არაა და საღამოსთვის უკვე კლდეში ნაკვეთი ქალაქების მხარეში აღვმოვჩნდით. კა-ზადოკია რბილ კლდოვან ქანებზეა გაშენებული, რამაც ხელი შეუწყო კლდეში ნაკვეთი ქალაქ-გამოქვაბულების შექმნას, სადაც პირველ საუკუნეებში ქრისტიანული დასახლებები წარ-მოიქმნა. დღეისათვის ქვაში ნაკვეთი ქალაქები მუზეუმებადაა ქცეული და მათ მილიონობით ტურისტი სტუმრობს. მოქმედი ტაძრები კაზადოკიაში არ არის, მაგრამ ადგილობრივი ხელი-სუფლება ზოგ შემთხვევაში თვალს ხუჭავს, როცა რომელიმე მიტოვებულ მღვიმეში, სადაც ადრე ტაძარი იყო, მომლოც-ველები ნახევრად ფარულად ღვთისმსახურებას აღავლენენ. ჩვენც ვისარგებლეთ ამგვარი შემთხვევით და კანადიკიის ერთ-ერთ ყოფილ ტაძარ-მღვიმეში წმინდა წირვა ჩავატარეთ ქარ-თულ ენაზე. განსაკუთრებით შთამბეჭდავი იყო მ. გაბრიელესა და მ. პიერის მიერ აღვლენილი ეს წირვა წმ. ნინოს მშობლიურ მხარეში. თითქოს უხილავი ძაფი გაიბა საუკუნეებს შორის, როცა, ღვთისმშობლის კურთხევით, კაზადოკიელი ქალწული მისთვის უცნობი ქართლისაკენ გამოემურა.

კაზადოკიას მრავალი მომლოცველი სტუმრობს, ეკლესიის წყალობით, კათოლიკე მორწმუნეებს საშუალება აქვთ წმინდა წირვების ჩატარებისა. ჩვენს სასტუმროშიც იყო წირვა-ლოც-ვების აღვლენის საშუალება. მომლოცველთა ჯგუფებისათვის

წიგნის სამკითხველო დარბაზი გათვალისწინებული იყო წირ-ვებისათვის. მიუხედავად იმი-სა, რომ თურქეთი საერო სა-ხელმწიფოა და იქ რელიგიური მსახურება არარელიგიური მიზნებით აგებულ ნაგებობებ-ში იკრძალება, და ეს აკრძალ-ვა ნებისმიერ რელიგიას ეხება, ხელისუფლება თვალს ხუჭავს მსგავს ფაქტებზე.

ქრისტიანებისათვის წირვა-ლოცვების აღვლენის შესაძ-ლებლობის მთავარ ხელისშემწყოზ მიზეზს პილიგრიმობიდან მიღებული შემოსავალი წარმოადგენს. რაც მეტი მომლოც-ველი ჩავა თურქეთში, მით მეტ პრივილეგიებს მოიპოვებენ ქრისტიანები ამ სახელმწიფოში. საკმარისია, ამის მაგალითად, მოვიყვანოთ ტაო-კლარჯეთი, სადაც თუ ოციოდე წლის წინ ქართველ ტურისტს საერთოდაც არ გააჭაჭანებდნენ, დღეს იქ, ქართველი მომლოცველების წყალობით, ტურისტული ინ-ფრასტრუქტურა ჩამოყალიბდა და, კაზადოკიის მსგავსად, ად-ვილად ხელმისაწვდომი გახდა მომლოცველობა.

კაზადოკიის შთაბეჭდილებებიდან ერთი შემთხვევა მინდა გამოვყო, რომელიც განსაკუთრებით დამამახსოვრდა: ღია ცის ქვეშ მუზეუმში, ერთ-ერთი ტაძარ-მღვიმის მონახულე-ბის დროს, ქალაქ კაიზერიდან ჩამოსულ სკოლის მოსწავლეთა ჯგუფს შევხვდით. ვერ წარმოვიდგენდი, რომ საქართველო-დან ასე მოშორებული შიდა პროვინციის ქალაქის (სადაც არც გურჯებისა და არც ლაზების შთამომავლები არ ცხოვრობენ) დაწყებითი კლასის მოსწავლეებს ასეთი სიყვარული ექნებო-დათ ჩვენი ქვეყნის მიმართ. ამ 10-12 წლის ბავშვებმა, როცა გაიგეს, რომ საქართველოდან ვიყავით, ჩვენი მისამართით გულწრფელი სიყვარულისა და პატივისცემის გამომხატველი სკანდირება მოაწყვეს.

დასრულდა კიდევ ერთი ლამაზი მომლოცველობა ჩვენს მე-ზობელ ქვეყანაში, დიდი ქრისტიანული ტრადიციების მხარეში. იმედს გამოვთქვამთ, რომ მომლოცველთა ვედრებები ნაყოფს გამოიღებს და ახლო მომავალში დაკეტილი ტაძრები, რომელ-თაც, მართალია, ხელისუფლება იცავს და უვლის კიდევც, მის ჭეშმარიტ პატრონებს დაუბრუნდება. ამ მომლოცველობამ ის აზრი კიდევ უფრო განმიმტკიცა, რომ ოშკისა და ბანას სანაცვ-ლოდ, ნაცვალგების სახით, ორი ყოფილი მეჩეთის აღდგენა თურ-ქეთის მხრივ საქართველოს მიმართ კეთილმეგობრული ფესტია, თორემ საბერძნეთმა ათი მეჩეთის აღდგენაც რომ შესთავაზოს ერთი ტაძრის სანაცვლოდ, თურქეთი უარით უპასუხებს.

მომლოცველობა ნამდვილად საინტერესო, სულიერი და შთამბეჭდავი იყო, რაშიც დიდი დამსახურება მამა პიერს მიუძ-ღვის, რომელსაც ნამდვილად დიდი გამოცდილება და სიყვა-რული აქვს ახლო აღმოსავლეთის ქრისტიანული ადგილების მომლოცველობისა (როგორც თავად განაცხადა, ამ მხარეში ეს მისი რიგით მეათე მომლოცველობა იყო). ვსარგებლობ შემთხვევით და, ყველა მომლოცველის სახელით, დიდი მად-ლობა მინდა ვუთხრა მამა გაბრიელეს, მამა პიერს, რომლის მღვდლად ხელდასხმის 25 წელი ერთად ვიზეიმეთ, ასევე იზ-მირის ეპარქიის მთავარეპისკოპოსს გუჯეროს, ეფესოს კაპუ-ცინთა მისიას მასპინძლობისათვის და მთელი მომლოცველო-ბის მანძილზე გამოჩენილი ზრუნვისა და სითბოსათვის.

**ნუზზარ ბარდაველიძე**

## საბა

# XIII საუკუნე და ეკლესიის ერთიანობა

„ახლა ვნახოთ, როგორი „ძმური განწყობა“ ჰქონდა ათონზე ლათინების მიმართ ივერონს და პირიქით: 1274 წელს ლათინებმა დაარბიეს ივერონის საძმო, ლათინებმა და არა ჯვაროსნებმა, მაგრამ შედეგისთ-

<span></span>
<p><span>(გაგრძელება, დასაწყისი „საბა“, №6, 2012)</span></p> <p>ნაწილი II</p>

### ლიონის კრება

1261 წელს კონსტანტინოპოლის დაპყრობა იმპერიის პრობლემას ვერ გადაჭრიდა; პრობლემები მხოლოდ დროებით მოგვარდა მიხეილ VIII-ის პოლიტიკური და დიპლომატიური გამჭრიახობის წყალობით; მისმა მემკ-ვიდრეებმა კი ველარ შეძლეს მათი გადაჭრა. მიხეილი 1224 წელს დაიბადა, იგი ანდრონიკე პალეოლოგოსისა და თეოდორა პალეოლოგოსის ძე გახლდათ. 1258 წელს, 36 წლის ასაკში, ეპილეფსიის მძიმე ფორმით დაავადებული თეოდორე II ლასკარისი, ბიზანტიის იმპერატორი 1254-1258 წლებში, გარდაიცვალა და ტახტი დაიკავა მისმა ძემ იოანე IV ლასკარისმა (1250 -1305), ჯერ კიდევ ბავშვმა. ანდერძის პირობების თანახმად, მმართველობა გადაეცა იმპერატორის მეგობარს, გიორგი მუზალონს (Giorgio Muzalon), რომელსაც თავს დაესხნენ იმპერატორის და-ლუპვიდან ცხრა დღის შემდეგ გამართული სამგლოვიარო ცერემონიალის დროს და მოკლეს. მავანნი ფიქრობდნენ, რომ ამაში მომავალი იმპერატორის, მიხეილის ხელი ერია. გადმოცემის თანახმად, როდესაც 1261 წელს, აღსაყდ-რების ცერემონიალის შემდეგ, ბასილევსი დედაქალაქ-ში შევიდა, ძველ საიმპერიო სასახლეში განმმართვედა მომავალ პრობლემებზე დასაფიქრებლად. პრობლემები კი მრავლად იყო: ქალაქისა და მისი უბნების კონსოლიდაცია, გალავნის გამაგრება, ეკლესია-მონასტრების აღდგენა; მანვე დაგეგმა წმიდა მოციქულთა სახელობის ტაძრის წინ მიქაელ მთავარანგელოზის მონუმენტური ქანდაკების დადგმა (მასში დაეჭვებული ეკლესიის ყურადღების მი-საპყრობად)...., პირველ რიგში კი, მისახედი იყო პოლიტიკა და დიპლომატია. პაპი ურბან IV, რომელიც ადრე იერუსა-ლიმის ლათინი პატრიარქი გახლდათ, ვერ ურიგდებოდა იმპერიის ასე მოულოდნელ დაცემას. ევროპის სხვადასხვა საგრაფოების მმართველები და ხელმწიფეები მხოლოდ და მხოლოდ საბაბს ეძებდნენ მიყენებული შეურაცხყოფის საპასუხოდ. თუკი ზოგი მათგანი, მაგალითად, მანფრედი, რომელიც სიციალიაში დაბრუნდა, ან კარლ ანჟუელი, კო-ალიციას შექმნიდნენ, ბიზანტიური იმპერიის მიერ ახლად დასახულ კურსს მამინვე ჩაახშობდნენ. დიდმა პალე-ოლოგოსმა იგრძნო დასავლეთთან თანხმობის მიღწევის

## საბა

ვის ამას მნიშვნელობა არა აქვს და ამგვარი ქმედება-ნი ათონზე ლათინთა ბატონობის დროს ხშირი იყო“.
(Д. Оболенский, Византийских портретов М. Янус-к, 1998, ც. 500)

აუცილებლობა; პაპ ურბან IV-ის დახმარებით, მიხეილი თავის ყოფილ მტრებს შეურიგდა. დროის მოკლე მონაკ-ვეთში იმპერატორს ისლა დარჩენოდა, რომის პაპისთვის მიემართა. გასაკვირი არაა, რომ მიხეილ VIII-მ, რომელმაც შეიტყო ურბან IV-ის არჩევის შესახებ, დესპანი გაუგზავნა მას თხოვნით, რომ გაეერთიანებინა ბერძნული და რომა-ული ეკლესიები, თუმცალა წმიდა საყდარში გაგზავნილი ორი დესპანიდან ერთი, რომელთაც მისი აღსაყდრების შესახებ უნდა ემცნოთ (ასე მოგვითხრობს მატიანე), ცოც-ხლად გაატყავეს, მეორე კი სასწაულებრივად გადარჩა. 1263 წლის გაზაფხულზე კალაბრიის ქალაქ კროტონის ლათინი ეპისკოპოსი, ბერძენი, სახელად ნიკოლა, ძალ-ზე განსწავლული პიროვნება, ბასილევსის დავალებით, კონსტანტინოპოლიდან რომს გაემგზავრა. გაცილებით ადრე, იგი ბიზანტიის საიმპერიო კარს ეწვია, რათა იმ-პერტორისთვის ბერძნულ ენაზე გაეცნო რომის ეკლესიის მრწამსი. ეპისკოპოსის გამჭრიახობამ და შემრიგებლურმა პოზიციამ წარმატება მოიტანა. მან პაპს გადასცა იმპე-რატორის წერილი, სადაც მინიშნებული იყო ორი ეკლე-სიის შეერთების შესაძლებლობა. პალეოლოგოსმა ურბან IV-ისადმი ისეთი დიდი მოწინება და კეთილგანწყობა გამოიჩინა, რაც რომის ეკლესიის თავის მიმართ არცერთ სხვა იმპერატორს არ გამოუჩენია. წერილში საუბარი იყო ერთგულებასა და მორჩილებაზე. ურბან IV-მ შემთხვევა ხელიდან არ გაუშვა, რადგანაც მას, როგორც წარსულში იერუსალიმის ლათინ პატრიარქს, კარგად მოეხსენებოდა წმიდა ადგილებში არსებული ვითარება და ქრისტიანთა ახალი ჯვაროსნული ლაშქრობის აუცილებლობა. ამიტომ საჭირო იყო ქრისტიანთა გაერთიანება; ჩავიდა თუ არა პაპის საპასუხო წერილი კონსტანტინოპოლში, გარკვეულ საკითხთა განსახილველად და საბოლოო გადაწყვეტილე-ბის მისაღებად კრების მოწვევა გადაწყვიტეს, რასაც უნდა დალოდებოდა პაპი, მაგრამ სანამ ასამბლეა შედგებოდა, ურბან IV 1264 წელს მოულოდნელად გარდაიცვალა.

ახალი პაპი, კლემენტ IV, ისიც წარმოშობით ფრანგი, კატეგორიულად უარყოფს კრების მოწვევის აუცილებ-ლობას, და აცხადებს, რომ „რწმენის სინწმინდე ეჭვქვეშ არ უნდა დადგეს“ და, მით უფრო, არ უნდა გაიმართოს კამათი არც „ფილიოკვეს“ და არც ამ ორ ეკლესიას შორის არსებულ ნებისმიერ საღვთისმეტყველო საკითხებზე, დოგმატურ განსხვავებაზე. 1267 წლის 4 მარტს, პაპი კლე-მენტ IV, მიხეილ VIII-ის მხრიდან მშვიდობისა და ერთიანო-

## 12



## საგანგებო ჩანართი

ბის მოთხოვნის პასუხად, მას გაუგზავნის გრძელ წერილს, სარწმუნოების აღსარებასთან ერთად, რაზეც ბიზანტიის იმპერატორსა და მთელ აღმოსავლურ ეკლესიას უპირობოდ უნდა მოენერა ხელი. სარწმუნოების ეს აღსარება ითვალისწინებდა: „ფილიოკვეს“ მიღებას და აღმოსავლურ ეკლესიაზე რომის პაპის იურისდიქციის დაწესებას; აზიმის (ხმიადი) პურით ევქარისტიულ ზიარებას; აღმოსავლელი პატრიარქების მიღებას რომის პაპის დელეგატების რანგ-ში. მოვლენათა ამგვარი განვითარების ფონზე, ერთიანობა კიდევ უფრო შეუძლებელი ჩანდა, მაგრამ ბიზანტიის წინააღმდეგ ანჟუელის (angioina) მუქარა უფრო მეტად რეალური ხდება. ბიზანტიის იმპერიაში აშკარა სირთულე მაშინ გადაილახა, როდესაც კლემენტ IV დათანხმდა მიხეილის წინადადებას, მიეღოთ ახალი ტრაქტატი ორი ეკლესიის ერთიანობის შესახებ. მართალია, პაპი 1268 წელს გარდაიცვალა, მაგრამ იმპერატორმა კარგი მოკავშირე იპოვა საფრანგეთის ღვთისმოსავი მეფის, ლუი IX-ის სახით, რომელმაც შეძლო, თავისი ძმისთვის, კარლ ანჟუელისთვის ბიზანტიის წინააღმდეგ აგრესიული ჩანაფიქრი გადაეფიქრებინა და ჯვაროსნული ლაშქრობა ტუნისის წინააღმდეგ მოეწყო (1270 წ).

საბოლოოდ, 1271 წელს, სამწლიანი მოლოდინის შემდეგ, არჩეულ იქნა პაპი გრიგორი X, როდესაც იგი ჯერ კიდევ პალესტინაში იმყოფებოდა მეფე ედუარდ I-თან ერთად. ეკლესიების გაერთიანება მან რელიგიურ ჭრილში გადაიტანა და ამ გზით გააიოლა იმპერატორის პოლიტიკა. აღმოსავლეთში მოგზაურობამ მასზე ღრმა შთაბეჭდილება მოახდინა და მან გადაწყვიტა, რადაც არ უნდა დასჯდომოდა, იერუსალიმი დაეპყრო. მაგრამ რადგანაც იერუსალიმის დაპყრობა შეუძლებელი იქნებოდა ბიზანტიელების დაუხმარებლად, საჭირო იყო ეკლესიის დაუყოვნებლივ გაერთიანება. ამისთვის კი აუცილებელი იყო, კარლ ანჟუელს უარი ეთქვა თავის ექსპანსიურ მიზნებზე და ასევე ბიზანტია-ვენეციის შეთანხმების გადახედვა. 1271 წლის ოქტომბერში, არჩევიდან ერთი თვის თავზე, პაპმა პირადად მიიწვია მიხეილ პალეოლოგოსი ეკუმენურ კრებაზე, რომელიც ორი წლის შემდეგ უნდა გამართულიყო ლიონში. 1272 წელს მან კონსტანტინოპოლში ოთხი ფრანცისკელი ბერისგან შემდგარი ახალი დელეგაცია გაგზავნა, რომელსაც უნდა ეცნობებინა მისი ნება კრების მოწვევის თაობაზე, რათა წმიდა მიწას დახმარებოდნენ, მოეხდინათ საეკლესიო რეფორმა და მიედწიათ ერთობისთვის. მაგრამ მიხეილ VIII პალეოლოგოსს ჯერ ფიცი უნდა დაედო და ელიარებინა მრწამსი, რაც თავის დროზე იქნა გაგზავნილი კლემენტ IV-ის მიერ. მხოლოდ ამის შემდეგ მოიწვევდა პაპი კრებას, სადაც იგი დისკუსიას კი არ გამართავდა გარკვეულ საკითხებზე, არამედ, უბრალოდ, განამტკიცებდა საჯარო დასტურით გამოხატულ ერთობას. ამავედროულად, გრიგორი X სწერს კონსტანტინოპოლის პატრიარქს, იოსებ I-ს და ბერძენ პრელატებს, რომ მხარი დაუჭირონ მას და დაითანხმონ იმპერატორი წაყენებულ პირობებზე. გრძნობდა რა არსებულ სირთულეს, იმპერატორს არც მოუკითხავს რომის ეკლესიაზე დაქვემდებარების მისთვის კარგად ნაცნობი აქტი: ისიც საკმარისი იყო, რომ ეპისკოპოსებს ელიარებინათ რომის უზენაესობა. თავის პასუხში იმპერატორმა მას (პაპს) აცნობა, რომ მისთ-

ვისაც პრიორიტეტული იყო ეკლესიათა ერთობის საკითხი, და რომ აუცილებლად გაგზავნიდა კრებაზე წარმომადგენლებს. მაგრამ ასე როდი ფიქრობდა კონსტანტინოპოლის ეკლესიის უმრავლესობა. იმპერატორის ურთიერთობა ეკლესიასთან თავიდანვე პრობლემური იყო. ლეგიტიმური იმპერატორის, იოანე ლასკარისის (Giovanni Lascaris) დაბრმავების გამო, პატრიარქ არსენ ავტორიანუსის (Arsenio Autoreianus) მიერ შეჩვენებულმა იმპერატორმა გადაწყვიტა, პატრიარქისთვის სამაგიერო გადაეხადა, მის წინააღმდეგ სამხილები გამონახა და კრების დადგენილებით გადააყენა (1266 წ). თუმცა შეიქმნა ფრაქცია – არსენის მომხრეები – მტრულად განწყობილნი ოფიციალური ეკლესიის პოლიტიკის მიმართ. მიუხედავად იმისა, რომ ბერმონაზონთა უმრავლესობა და ბერძენი ხალხი, რომლებიც ცუდად იყვნენ განწყობილნი დასავლეთისა და დასავლური თეოლოგიის მიმართ, ეკლესიათა ერთიანობის საკითხთან დაკავშირებით, ბიზანტიის ეკლესიის ოპოზიცია ადვილად ვერ შეენიწააღმდეგებოდა ეკლესიის ავტორიტეტულ ფიგურებს. პატრიარქი იოსებ I გალესიოტესი (Galesiotes), რომელმაც შეცვალა პატრიარქი არსენი, ვერაფრით ვერ დაარწმუნეს, ელიარებინა ეკლესიათა ერთიანობის საჭიროება; მან დაიფიცა, რომ ამას არასოდეს გააკეთებდა, ხოლო როდესაც ეკლესია გაერთიანდებოდა, იგი მონასტერში ჩაიკეტებოდა.

იოანე ბეკოსი, მომავალი პატრიარქი, რომელმაც ეკლესიის ერთობის საკითხთან დაკავშირებით შეკრებილ სინოდზე იმპერატორის თეზისების წინააღმდეგ გაილაშქრა, სხვა გამოჩენილ პირებთან ერთად, დააპატიმრეს. ასე იყო თუ ისე, თვეების მანძილზე მიმდინარეობდა დიალოგი საპატრიარქო კურიასა და საიმპერიო სასახლეს შორის, რომთან კავშირის დადებითსა და უარყოფით მხარეებზე; იმპერატორმა მოახერხა, თავის უნიატურ თეზისებში ბერძენი ეპისკოპოსებისა და მიტროპოლიტების დიდი ჯგუფი ჩაერთო და დაერწმუნებინა ისინი, რომ მიეღოთ კლემენტე IV-ის მრწამსი, იმ შეგნებით, რომ ეს არ ნიშნავდა რაიმე ცვლილებას საეკლესიო წესებში, არც „მრწამსის“ ბერძნულ ტექსტში რაიმეს შეცვლას, ან დამატებას. 1274 წლის ლიონის კრებამდე, კონსტანტინოპოლის საიმპერიო სასახლეში, იმპერატორი, მიტროპოლიტები, ეპისკოპოსები, და მათთან ერთად ორმოცდაოთხი პრელატი, საზეიმოდ დებენ ფიცს და აღიარებენ კლემენტე IV-ის მრწამსს. შემდეგ იმპერატორი თავისი დელეგაციისთვის დაცვას ითხოვს. პაპმა ეს მისია დააკისრა მონტე-კასინოს აბატს. ამასთან დაკავშირებით, პაპი გრიგორი X კრებას იწვევს ლიონში, სადაც უნდა წარდგენილიყო ბერძნული დელეგაცია. დელეგატთა მოგზაურობა რთულად და უსიამოვნოდ წარიმართა, შტორმის დროს ერთ-ერთი გემი ჩაიძირა. როცა მათ 24 ივნისს ლიონს მიაღწიეს, კრება უკვე 7 კვირის დაწყებული იყო; ბერძნული დელეგაცია, რომელიც შედგებოდა ორი ეპისკოპოსისა და იმპერატორის მდივნისაგან, ზარ-ზეიმით მიიღეს; პაპმა მათ მშვიდობის ამბორიც მისცა. 29 ივნისს, წმიდა პეტრესა და წმიდა პავლეს დღესასწაულზე, პაპი ორ ენაზე წარუძღვა საზეიმო წირვას და ამით ბიზანტიასთან სქიზმის დასრულება აღნიშნა: წარმოთქვეს მრწამსი, როგორც ბერძნულად, ასევე ლათინურად, ხოლო ფილიოკვეს ფორმულა ლამის სამგზის

## საგანგებო ჩანართი

იქნა გაცხადებული. 6 ივლისს კრების მეოთხე სესია შედგა, რომელიც ბერძნებთან ერთიანობას მიეძღვნა. გრიგორი X-მ, მას მერე, რაც შეაჯამა წინასწარი მოლაპარაკების შედეგები, განაცხადა, რომ ბერძნები „თავისი ნებით ემორჩილებიან რომაულ ეკლესიას“. ბერძენი დელეგატები იმეორებდნენ თებერვლის თვეში კონსტანტინოპოლში იმპერატორის მიერ ფორმულირებულ მორჩილებისა და რწმენის აღიარების აქტს. მათ წაიკითხეს იმპერატორის წერილის ლათინური ვერსია, რომელიც მოიცავდა ერთდროულად რწმენის აღიარებას, ფილიოკვეს, პაპის პრიმატს და ივარგლებოდა იმ თხოვნით, რომ ბიზანტიის ეკლესიას შეენახა სქიზმამდელი მრწამსი და ყველა რიტუალი, რაც რომის ეკლესიის ნორმებთან შესაბამისობაში არ მოდიოდა. ამას მოჰყვა ნიკეა-კონსტანტინოპოლის მრწამსის საზეიმო გალობა, ფილიოკვეს დამატებით (ორგზის იგალობეს); იმ დღეს, ყოველგვარი კამათის გარეშე, გაცხადდა ერთიანობა. 220 წლის შემდეგ, აღმოსავლეთისა და დასავლეთის ეკლესია ერთმანეთს დაუკავშირდა, 17 ივლისს კრება იხურებოდა. კარლ ანჟუელს უარი უნდა ეთქვა დაგეგმილ დამპყრობლურ ომზე და 1276 წლის 1 მაისამდე ხელი მოენერა განიარაღებაზე; 1275 წლის მარტში განახლდა ვენეციასა და ბიზანტიის იმპერიას შორის დადებული ტრაქტატი.

მართალია, 1275 წლის 16 იანვარს კონსტანტინოპოლში, საიმპერიო სასახლეში გამართეს საზეიმო ლიტურგია ერთიანობის მიღწევის აღსანიშნავად, მაგრამ მიხეილს ძვირად დაუჯდა ეს ერთობა: დედაქალაქის ქუჩები სულ მალე გაივსო მანიფესტანტებით, რომლებიც მრწამსის მოლატეობაზე გაჰყვიროდნენ. ბერძენი ხალხი იმპერატორს აუჯანყდა. წინააღმდეგობამ და განხეთქილებამ საიმპერიო ოჯახშიც იჩინა თავი. პატრიარქი იოსებ I გალესიოტესი, დაპირებისამებრ, გადადგა და იმავე წლის მაისში იგი შეცვალა იოანე XI ბეკოსმა, რომელსაც, საპატიმროში დიდი ხნის განსჯის შედეგად, უკვე მოესწრო უნიატური თეზისების გაზიარება.

სულ რაღაც ცამეტწლიანი დამოუკიდებლობის შემდეგ, რატომ უნდა მოქცეულიყვნენ ბერძნები ისევ ლათინთა უღელქვეშ, რომლებიც 57-წლიანი ოკუპაციის შემდეგაც ვერ დაარწმუნეს, აზრი შეეცვალათ მათზე? რატომ ვერ გაითვალისწინა მიხეილ პალეოლოგოსმა, რომ ამას აუცილებლად მოყვებოდა რეაქცია ეკლესიის მხრიდან? ან იქნებ იცოდა, რომ ასეც მოხდებოდა, მაგრამ პოლიტიკური და ეკონომიკური მოტივების გამო არაფერს გაუნია ანგარიში? რატომ გაუსწორდა იგი ასე სასტიკად ერთიანობის მოწინააღმდეგებს? ალბათ იმიტომ, რომ მას თავისი იმპერიის გადასარჩენად სხვა გზა არ ჰქონდა, ყოველ შემთხვევაში, იმ მომენტში რომთან ერთობა იმპერიის მოქიშპეებს ყოველგვარ გზას უჭრიდა მის წინააღმდეგ გასალაშქრებლად; ამავე დროს, თავისუფალი ასპარეზი რჩებოდა იმისათვის, რომ ბალკანეთის ნახევარკუნძულიდან ლათინები გაეძევებინათ. მიუხედავად იმისა, რომ შესაძლებელია, პასუხი დამაკმაყოფილებელი იყოს, ამ დიდი იმპერატორის მოქმედება ჯერ ისევ ზადებს მრავალ კითხვას და გამოწვლილვით გამოკვლევას. მიუხედავად რომის ეკლესიასთან მისი უნიატური პოლიტიკის მარცხისა, რატომ არ გატეხა მან ფიცი და რატომ

ამჯობინა მომკვდარიყო შეჩვენებული, როგორც ბიზანტიის, ასევე რომის ეკლესიის მხრიდან, მით უფრო მაშინ, როდესაც პაპის, მარტინ IV-ის შეჩვენების შემდეგ, მან შეძლო ბიზანტიის ეკლესიასთან ზიარების განახლება? იქნებ, ეს ყველაფერი წმიდა წყლის პოლიტიკა იყო? ან იქნებ მიცემული სიტყვისადმი ერთგულება? ცხადია, ყველაფერი ასე იყო, მაგრამ, ჩემი აზრით, ჩვენ უნდა გავცდეთ წმინდა პოლიტიკურ ინტერპრეტაციას და უნდა ვეძებოთ ის მიზეზები, რამაც გამოიწვია მისი პოლიტიკური კურსის წარუმატებლობა. როდესაც 1276 წელს პაპი გრიგორი გარდაიცვალა, მასთან ერთად დასამარდა მისი, როგორც პონტიფექსის, იდეები; პაპი პალეოლოგოსში ყოველთვის ხედავდა ალებული მოვალეობის ერთგულ შემსრულებელს. მომდევნო პაპების მხრიდან აშკარად იგრძნობოდა უყურადღებობა იმ ორმხრივი ინტერესების მიმართ, რაც საერთო ჭრილში განიხილებოდა. ხანმოკლე პერიოდით არჩეული, ფილო-ფრანგული პოლიტიკის მომხრე ორი პაპის (ადრიან V და იოანე XXI) შემდეგ, 1277 წელს ახლად არჩეული პონტიფექსის, ნიკოლოზ III-ის ანტიფრანგული პოლიტიკის წყალობით, ბიზანტიის იმპერია გათავისუფლდა მისი მოქიშპის, კარლ ანჟუელისაგან. თუმცა, ამავე დროს, ნიკოლოზ III, რომელსაც არ გააჩნდა მოთმინებისა და დიპლომატიის ისეთივე უნარი, როგორიც გრიგორი X-ს, აცხადებდა, რომ ერთიანობა რეალობად იქცა აღმოსავლეთში; 1279 წლის გაზაფხულზე მან იმპერატორს გაუგზავნა წერილი, რომელშიც ბერძნებს ურჩევდა, არ შეენახათ სქიზმამდელი რიტუალები (ლიონის კრებაზე მიღებული გადაწყვეტილების საპირისპიროდ) და ასახელებდა პონტიფექსის ლეგატს, რომელიც სტაბილურად დაიდებდა ბინას ბიზანტიაში; აქ კი ვითარება ფრიად დამძიმდა. ბიზანტიაში გამართულ სინოდზე იმპერატორმა მიხეილ VIII-მ ისევ განაცხადა, რომ ერთ პუნქტსაც არ შეცვლიდა მრწამსში; 1280 წელს, როდესაც ნიკოლოზ III გარდაიცვალა, ისევ დაუბრუნდნენ ფილო-ფრანგულ პოლიტიკას და ისევ გაჩნდა ბიზანტიის ხელახალი ალების იდეაც; ამასობაში, მარტინ IV, დაუფიქრებლად შეაჩვენებს იმპერატორ მიხეილს. იმპერატორი აღაშფოთა უღირსმა მოპყრობამ. არცერთ ბასილევსს არ გაუკეთებია ამდენი პაპებისთვის, ახლა კი, მიუხედავად ყველაფრისა, მტრების ამარა მიატოვეს და 20 წლის მანძილზე საგულდაგულოდ ნალოლიავებს არღვევდნენ. ასე ეკვეცებოდა ფრთები გრიგორი X-ის ოცნებას და მარცხს განიცდიდა იმპერატორის პოლიტიკა; თუმცა იმპერატორი მაინც ერთიანობის მომხრე დარჩა, მხოლოდ გააუქმა ყველა ის საზომი, რაც ლათინურის მიმართ გამოიყენებოდა და შეეცადა, თავაზიანი დამოკიდებულება დაემყარებინა ბერძნულ ეკლესიასთან, რაც ამჯერად ჰაერივით სჭირდებოდა. ბიზანტიაში ერთიანობის მომხრეთა ჯგუფი კრიტიკულად უდგებოდა ეკლესიის ერთიანობასთან დაკავშირებულ სხვადასხვა პრობლემატურ საკითხებს. პოლიტიკური კურსის ცვლილებამ ბიზანტიაში თითქოს წერტილი დაუსვა მიხეილ VIII-ის გეგმებს, მაგრამ მისი დიპლომატიური უნარი ისევ გამოადგათ ევროპული პოლიტიკის ინტრიგებში. ამჯერად, 1282 წლის 31 მარტს ფორტუნამ „vespri siciliani“-ის („სიცილიური მწუხრი“) მხარეს გადაინაცვლა. ეს იყო დიდი აჯანყება სიციალიაში ანჟუელთა დინასტიის ბატო-



ნობის წინააღმდეგ, რომელსაც ასევე ბიზანტიაც აფინან-სებდა, რითაც წერტილი უნდა დასმოდა კუნძულზე ანჟუელების დინასტიის ბატონობას და ბიზანტიის წინააღ-მდეგ კარლ ანჟუელის ექსპანსიონისტურ მიზნებს. მიხე-ილის სიკვდილის შემდეგ (1281 წ. 11 დეკემბერი), მისი შვილი და მემკვიდრე ანდრონიკე მეორე მაშინვე დაგმობს მამის მრწამსს და დასავლეთთან ყოველგვარ კონტაქტს წყვეტს. სანამ თანა-იმპერატორის ფუნქციას ასრულებდა, იგი ყოველთვის ემორჩილებოდა მამის უნიატისტურ პოლიტიკას, თუმც არ იყო ამის მომხრე. მას არ დავინწყე-ბია, რომ მამა, ერესისა და სქიზმის გამო, შეჩვენებული წავიდა ამქვეყნიდან და, სამშობლოში დაბრუნებული, პონტიფექსისადმი ერთგულების ფიცს აუქმებს. მან გადააყენა პატრიარქი იოანე ბეკოსი, ერთიანობის გულ-მოდგინე მომხრე, და მის ადგილზე თავის ძველ მეგობარს, იოსებს მოუხმო. 1274 წლის თებერვალში, კონსტანტინო-პოლში, შემდეგ კი ლიონში, 6 ივლისს ფორმულირებულმა ერთიანობის აქტმა მხოლოდ მისი მომხრეების სიცოცხლე-ში იარსება. ნაცვლად იმისა, რომ საზეიმოდ განემტკიცე-ბინა ერთიანობა, ლიონის კრებამ უფრო მეტად გააღრმავა პოლიტიკური და რელიგიური ხნული დასავლურსა და აღმოსავლურ ქრისტიანობას შორის. რატომ განიცადა მარცხი ლიონის უნიაშ? როგორც რომში, ასევე კონსტან-ტინოპოლში, თუკი ერთიანობა აუცილებელი და გადაუდე-ბელი იყო, არჩეული მეთოდები, როგორც ადაპტირებული მოტივაციები, ვერ იქნებოდა გარანტია სამართლიანი და გრძელვადიანი გადანყვეტილებებისთვის. უნიაშ მარცხი განიცადა არა იმიტომ, რომ დიალოგი არ შედგა აღმოსავ-ლურ ეკლესიასთან, არამედ იმიტომ, რომ მიხეილ VIII-მ მოინდომა, თავისი ეკლესიისთვის იძულებით მოეხვია თავს ერთიანობის იდეა და მოწინააღმდეგეთა დევნითა და შევიწროებით მიეღწია სანადელისთვის, რამაც პოზიცი-ების რადიკალიზაცია გამოიწვია და შეიქმნა ძლიერი ანტიუნიატური ოპოზიცია. როგორც იმპერატორი, იგი ვალდებული იყო, რადაც არ უნდა დასჯდომოდა, შეენარ-ჩუნებინა იმპერიისა და ეკლესიის ერთიანობა. ის იყო არა მებრძოლი იმპერატორი, არამედ დიპლომატი და, ალბათ, ყველაზე დიდი მმართველი, ვინც კი ოდესმე ჰყოლია ბიზანტიას. მიუხედავად მრავალი ნაკლისა, იგი ისტორი-აში შევიდა, როგორც დიდი იმპერატორი. მის მიერ ჩადე-ნილმა დანაშაულებმა მთელი მსოფლიო აღაშფოთა. მაგრამ ცოტა თუ შეძლებდა ასე დარწმუნებით ემართა იმპერია მისი ისტორიის ყველაზე სახიფათო პერიოდში. დამარცხდა არა იმიტომ, რომ რომში ამ დროს განსხვავე-ბული იდეებისა და გამოცდილებების მქონე მრავალი პაპი ჩაენაცვლა ერთმანეთს, არამედ იმიტომ, რომ საბოლოოდ, რომის ეპისკოპოსმა ისურვა აღმოსავლეთზე თავისი საყოველთაო უფლების გავრცელება და აქედან დიდი სარგებლის მიღება; დამარცხდა პოლიტიკური ინტრიგების გამო, რასაც ვერ გაექცა და რისი მსხვერპლიც თავად აღმოჩნდა; დამარცხდა იმიტომაც, რომ დაუპირისპირდა ორთოდოქსულ ეკლესიას, ბერ-მონაზვნებსა და მორწმუ-ნეებს, ნაცვლად იმისა, რომ, ერთიანობის გზების ძიები-სას, მათთან ეთანამშრომლა. იმპერიის მართვისას, იგი არასწორ მეთოდებს იყენებდა, ჯიუტად იყო დარწმუნებუ-ლი საკუთარ სიმართლეში და მხოლოდ ის სურდა, რომ

მისი შინებოდათ; ერთიანობის რეალიზების მცდარი გზების ძიების პროცესში, მარცხი ასევე გამოწვეული იყო ლათინურ ეკლესიაში ოპოზიციის არარსებობის გამო; ახალი რელიგიური ორდენები ცდილობდნენ, პაპის პრიმატის შესახებ საყოველთაო განწყობა დადებითი ყოფილიყო, მაგრამ თუ ამ დოქტრინას დასავლეთი უპრობ-ლემოდ იღებდა, მთელი ქრისტიანული სამყაროსთვის მისი მიღება შეუძლებელი იყო. საუკუნეების შემდეგ, პავლე VI, 1974 წლის 19 ოქტომბრის ერთ-ერთ წერილში იხსენებს, რომ ერთიანობა ასე გაიაზრებოდა: „არ მიცემოდა ბერძ-ნულ ეკლესიას იმის ნება, რომ თავისუფლად გამოეხატა თავისი აზრი ამასთან დაკავშირებით. ლათინებმა, ფაქ-ტობრივად, აირჩიეს ტექსტი და ფორმულა, რაც დასაბამს უდებდა დასავლეთში ჩამოყალიბებულ და შედგენილ საეკლესიო მოძღვრებას“. დამარცხდა იმიტომ, რომ ამას იგი ხან პოლიტიკური, ხანაც რელიგიური მიზნების მისაღწევად იყენებდა. XIII საუკუნე ისე სრულდებოდა, რომ ეკლესიათა ერთიანობისთვის არაფერი სახარბიელო არ გაკეთებულა. საბოლოოდ დამარცხდა არა პაპი, ან იმპერატორი, არა პარტია, ან რომელიმე ჯგუფი, დასამარ-და დასავლური და აღმოსავლური ეკლესიების გაერთიანე-ბის მცდელობა. საბედნიეროდ, ამ მარცხის შემდეგ, მომდევნო ეპოქაში მალევე გაკეთდა ღრმა ანალიზი ყველა იმ მიზეზისა, რამაც გამოიწვია სქიზმა. მთელი XIV საუკუ-ნე გაჯერებულია კონსტანტინოპოლის იმპერატორების მხრიდან ერთიანობის თემაზე მოლაპარაკებების გარკვე-ული მცდელობებით. ეს იყო ფორმალური შეხვედრები, რომელსაც ადგილი ჰქონდა 1333, 1339, 1347 და 1355 წლებში. ის, ვისაც სურდა სქიზმის გადალახვა, უფრო ღრმად სწავლობდა საღვთისმეტყველო განსხვავებებს და ცდილობდა ეჩვენებინა, რომ არ არსებობდა მოტივი სქიზმის გასაგრძელებლად, რადგანაც როგორც ლათინუ-რი, ასევე ბერძნული დოქტრინა სრულ თანხმობაში მოდიოდა ღვთის სიტყვასთან. ხოლო შერიგების მოწი-ნააღმდეგენი იმავე საკითხებს სწავლობდნენ და ცდილობ-დნენ ეჩვენებინათ, რომ მეორე მხარის მიერ გაკეთებული ინტერპრეტაციები მცდარი იყო და ამიტომ მათთან საეკლესიო ზიარება არ შეიძლებოდა. გადამწყვეტი როლი კიდევ ერთხელ ითამაშა არა-თეოლოგიურმა ფაქტორმა. რამეთუ ის, ვისაც მკაფიოდ ჰქონდა გაცნობიერებული წარსულის კრიზისი, იოლად რწმუნდებოდა ბერძნებისა და ლათინების შეუთავსებლობაში, ხოლო ის, ვისაც იმედი ჰქონდა, რომ დასავლეთი დასუსტებულ ბიზანტიის იმპერიას პროტექციასა და დახმარებას გაუწევდა, ხშირად საპირისპირო თეზისებს იშველიებდა. ყველაფერი ეს ნახევარი საუკუნის შემდეგ, ფერარა-ფლორენციის კრებაზე (1438-1439), წინა პლანზე გადმოიწევს.

1274 წლის ერთიანობის მცდელობის შესახებ ფასდა-უდებელი მოწმობა მოგვეპოვება, ორნავიანი არქიტექ-ტურით აგებული ეკლესიის სახით, სადაც ერთი ნავი განკუთვნილია კათოლიკეებისთვის, ხოლო მეორე – მართ-ლმადიდებელთათვის.

(გაგრძელება შემდეგ ნომერში)

მოამზადა
მამა ბაბრიელ ბრაბანტინიშ

# სულთმოფენობა ბათუმის სულიწმიდის ეკლესიაში

ბათუმის კათოლიკური ეკლესია სულიწმიდის სახელზეა აგებული, ამიტომაც სულთმოფენობის დღესასწაული გან-საკუთრებულად აღინიშნება ჩვენს საკრებულოში. წელს, ამ ზეიმზე ჩვენთან ერთად არ იმყოფებოდა ეკლესიის წინამძღვა-რი, მამა გაბრიელე ბრაგანტინი; იგი, მამა პიერ დიუმულენთან და მორწმუნეთა ჯგუფთან ერთად, მომლოცველობაში იყო კაპადოკიასა და ეფესოში. მიუხედავად ფიზიკური სიმორისა, ჩვენ თანაზიარებაში ვიყავით ჩვენს მოძღვართან და მორწმუ-ნეებთან, ვლოცულობდით მათთვის და დარწმუნებული ვარ, ისინიც ლოცულობდნენ ჩვენთვის.

ბათუმში 27 მაისს თბილი და წყნარი დილა გათენდა. გულე-ბი სიხარულით გვქონდა სავეს, რადგან დღესასწაულზე ჩვენ-თან ერთად იმყოფებოდა ჩვენი საყვარელი ეპისკოპოსი ჯუზე-პე პაზოტო.

ზოგჯერ ზოგიერთი ახალგაზრდა მღვდლისაგან გაიგონებ: დროებით ვარ ჩამოსული, საქართველოში დარჩენას არ ვაპი-რებო. მე მათ ასე ვეტყოდი: „ძვირფასებო, მღვდლად კურთ-ხევისას, თქვენ აღიბეჭდეთ ქრისტეს ბეჭდით და მოვალენი ხართ, ისევე ემსახუროთ ხალხს, როგორც ქრისტე ემსახუ-რებოდა, არა აქვს მნიშვნელობა, საქართველოში იქნებით, პოლონეთში, რუსეთში, თუ მსოფლიოს ნებისმიერ კუთხეში. თქვენ ამით დაიმსახურებთ მორწმუნეთა მადლიერებას, პა-ტივისცემასა და სიყვარულს“. ასეთი მსახურების მაგალითია მამა ჯუზეპე. მას ხალხთან ურთიერთობის, ადამიანის სულის განჭვრეტისა და სიმართლის განცდის განსაკუთრებული ნიჭი გააჩნია და მორწმუნეთაგან უსაზღვრო ნდობას, სიყვარულსა

# კათოლიკური ფესვების მქონე ქართველი ინგლისელი

დღევანდელი ჩვენი ჟურნალის განსაკუთრებული სტუმარია თეკლა ჯულაშვილი, რომლის წარმომავლობა დაკავშირებუ-ლია ორ – დიდი ისტორიის მქონე – ქვეყნასთან – ინგლისსა და საქართველოსთან. მისი მამა – მირიან ჯულაშვილი გახლავთ იოსებ ბესარიონის ძე სტალინის საგვარეულო ოჯახიდან. დედა – ქეით ლოიდი, დიდი ბრიტანეთისა და ჩრდილოეთ ირლანდიის გაერთიანებული სამეფოს დიდგვაროვანი ინგლისელი ლორ-დის, ცნობილი ენათმეცნიერის, პროფესორის, დოქტორ სტივენ ჰენრი ლოიდისა და მისი უდიდებულესობის, საქართველოს ბაგ-რატოვანთა სამეფო ოჯახის წარმომადგენლის – ქეთევან ერეკ-ლეს ასული ბაგრატიონის ქალიშვილია.

გასული საუკუნის 60-იან წლებში ლორდი სტივენი საქართ-ველოშიც დიდი პატივისცემითა და სიყვარულით ეპყრობოდა ქართველ კათოლიკეებს, განსაკუთრებით დაინტერესდა ივანე გვარამაძისა და მიხეილ თამარაშვილის ღვაწლით. მან მნიშე-ნელოვანი წვლილი შეიტანა აგრეთვე ივანე ჯავახიშვილის სა-ხელობის თბილისის სახელმწიფო უნივერსიტეტში ინგლისური

და პატივისცემას იმკის.

მამა ჯუზეპეს წინამძღოლობით, ლამაზი წირვა ჩატარდა. დღესასწაულზე ჩვენთან ერთად იყვნენ მამა კარლო დისტეფა-ნო და მონაზვნები, ლორედანა მონეტი და ანა მარია კრიველა-რი; ასევე, მორწმუნეების დიდი ჯგუფი შრომისა და ქუთაისის საკრებულოებიდან. წმიდა წირვას ესწრებოდნენ აგრეთვე სტუმრები სხვადასხვა ქრისტიანული საკრებულოდან და ქა-ლაქის საზოგადოების წარმომადგენლები.

როგორც ყოველთვის, ეპისკოპოსის ქადაგება ახლაც გულ-ში ჩამწვდომი და დამაფიქრებელი იყო. მიხაროდა, როდესაც ეკლესიაში სხვადასხვა ეროვნების მორწმუნეებს ვხედავდი. ეს იყო ჩვენი რწმენის – კათოლიკობის, მისი საყოველთაობის, ჭეშმარიტებისა და სიძლიერის დადასტურება.

წმ. წირვის დასრულების შემდეგ, სტუმრები მივიწვიეთ მამა გაბრიელ ასლანიშვილის სახელობის დარბაზში, სადაც გაიმარ-თა ოთიკო მღებრიშვილის მიერ, მისივე სცენარით გადაღებუ-ლი ფილმების ჩვენება. ამ ფილმებმა ბათუმსა და ახალციხეში პრიზები დაიმსახურა. ფილმებს დიდი მოწონება ხვდა წილად ჩვენს საკრებულოშიც. შემდეგ ახალგაზრდებმა გამართეს კონცერტი. სცენაზე ერთმანეთს ცვლიდნენ მოცეკვავეები, მომღერლები, მხატვრული კითხვის ოსტატები.

კონცერტის შემდეგ, ყველანი სუფრასთან მივიწვიეთ.

ეს დღე კიდევ ერთ სამახსოვრო, ლამაზ დღედ ჩაიწერება ბათუმის საკრებულოს ისტორიაში.

თენგიზ პარმაძსიზიშვილი



ენის განვითარების პროცესში, რის გამოც დიდი სიყვარლით მოიხსენიებენ ამჟამად უკვე პრო-ფესორ-მასწავლებლები ბატონ ლორდ სტივენს. რაც შეეხება თეკლა ჯულაშ-ვილს, იგი დაიბადა თბილისში, 1992 წლის 16 ივნისს. მან წარჩინებით (ვერცხლის მედალზე) დაამთავრა საჯარო სკოლა, ამჟამად სტუდენტია. მიუხედავად იმისა, რომ თეკლა მართლმადიდებლურ ოჯახში დაიბადა და ქართულ-მართლმადიდებლურ ტრადიციებზეა აღზრდილი (ლო-იდები რომაულ-კათოლიკეები არიან), თეკლამ აგნატების (პატ-რიარქალური) ტრადიციით კათოლიკური სარწმუნოება აღიარა.

მან თავად აღწერა პირველი ზიარების შეგრძნება, რასაც ამ ნომერში ჩვენი ჟურნალის საშუალებით გთავაზობთ სათაურით – „უძღები შვილი“ ქრისტეს სერობაზე.

რედაქცია

► 14 გვ.



## „უძლევი შვილი“ ქრისტეს სერობაზე

*„შიშისა და სინმიდის გრძნობა განსაკუთრებული ძალით აძგერდება ჩვენში, თუ ვიხილავთ ღვთის დიდებულებას. ამ გრძნობებს განვიცდით, თუ მის სიახლოვეს შევიგნებთ. რამდენადაც გვწამს, რომ ღმერთი ახლოა, ვამჩნევთ კიდეც ამ გრძნობებს...“  
/ჯონ ჰენრი ნიუმენი/*

### ◀ 13 გვ.

10 ივნისს, კვირას, „მზის“ დღეს, ტრადიციისამებრ, შევიკრიბეთ წმიდა მოციქულთა – პეტრესა და პავლეს ტაძარში, რათა მონაწილეობა მიგველო ჩვენი მაცხოვრის, ქრისტეს ხორცისა და სისხლის დღესასწაულის აღსანიშნავად გამართულ ლიტურგიაში და, მირონცხებული ბავშვების პირველი ზიარების მსგავსად, ჩვენც მიგველო ქრისტეს მადლმოსილი სხეული...

თითქოს ჩვეულებრივად გათენდა, მაგრამ ეს ჩვეულებრიობა დასაწყისი იყო, ერთი შეხედვით, განუცდელი და ჯერ არარსებული შეგრძნებისა ჩემს ცხოვრებაში, რადგან მეც, სწორედ ამ დღეს, ოცი წლის დაგვიანებით, პირველად ვეზიარე ქრისტეს სიყვარულს... დაგვიანებით, თუმცა, როგორც გვასწავლის „იგავი მეთერთმეტე ჟამის მუშაკზე“ – არასოდეს არ არის გვიან ღვთის სამსახურში ჩადგომა... ამ დღის შემდეგ, ბურუსით მოსილი და უშორესი წარსულივით მეჩვენება ჩემი განვლილი ცხოვრების წლები, რადგან უძლები შვილი „მკვდარი იყო და გაცოცხლდა, დაკარგული იყო და გამოჩნდა“ (ლუკ. 15,32) და „ასევე იქნება სიხარული... ერთი მომნანიებული ცოდვილის გამო“ (ლუკ. 15,10). მივიღე მადლი უფლისა ჩვენისა იესო ქრისტესი, სიყვარული ღვთისა და ზიარება სულისა წმიდისა, რომელიც მარადის დარჩება ჩემთან და ჩემში...

უჩვეულოდ ამაღლებული იყო წმიდა წირვა ამ დღეს, ეკლესია განსაკუთრებულად მორთული, ხოლო მღვდელნი და მრევლის წევრები საოცარი ხიბლით სავსენი, ამ ყველაფერს კიდეც უფრო ღვთაებრივ ელფერს მატებდა ქრისტეს სადიდებელი გალობანი და სხვადასხვა ენაზე გახმიანებული უფლის სიტყვანი... თეთრით მოსილი ბავშვები, ვითარცა ანგელოზნი, პურითა და ღვინის თასით ხელში, მაცილებდნენ საკურთხეულამდე, სადაც ჩვენი წინამძღვარი გველოდა... მან მიიღო ეს ძღვენი და აღავლინა სადიდებელი ლოცვა ქვეყნიერების მამისადმი, ძისა და სული წმიდის სახელით, და მიაგო მადლი, რადგან ღირს ვიქმენით მისგან ამ ძღვენისა... მუხლი მოვიყარე საგანგებოდ ჩემთვის გამოყოფილ ადგილზე და უეცრად უჩვეულო სიმსუბუქე ვიგრძენი... ფიზიკური სხეულის შეგრძნება აღარ მქონდა... თითქოს სხვა სამყაროში აღმოვჩნდი, სადაც ლიტურგიული კრებული ქრისტესთან შესახვედრად მიმაცილებდა... ღრუბლებიდან კი ანგელოზთა გუნდი გალობით მამხნევებდა – „გამხნევდი, ზეცის მემკვიდრე...!“ სულს სიხარული, ან უკეთ რომ ვთქვათ, განუსაზღვრელი ბედნიერება ეუფლებოდა... გული უცნაურად და უჩვეულოდ ფეთქავდა, არა როგორც უეცარი შიშის, ან ნერვიული შეგრძნების დროს, არამედ როგორც დიადის, საბედისწერო ცვლილების მოლოდინისას, რომელიც, უსაზღვრო ბედნიერების გამო, ადამიანის გულში ფარავს ყველა სხვა გრძნობას, გარდა სიყვარულისა...

უმალლესი ბედნიერება ჩვენი ცხოვრებისა არის რწმენა იმისა, რომ ვუყვარვართ ჩვენს შემოქმედს... ვუყვარვართ

ჩვენდაუნებურად... ბრმაც რომ იყოს ადამიანი, უსინათლო არ ეთქმის, თუ სიყვარული ატკობს ვინმესი... მერე როგორი სიყვარული!.. სათნოებით სავსე!.. რწმენა გქონდეს, თორემ მხედველობა საჭირო არცაა, – სული სულს ეძიებს და კიდეც პპოვებს... განა შეიძლება ამაზე დიდი ნეტარება?! შემოქმედისა და ქმნილების ურთიერთსიყვარული... უსინათლო რომ ვიყო, მთელი ქვეყნის სინათლეში არ გავცვლიდი ამ გრძნობას! ტაძარში, სადაც ყოველივე კაცებრივი დაქვემდებარებულია ღვთაებრივს, ხილული კი უხილავ რეალობას მოიცავს, რომლის წვდომაც მხოლოდ სარწმუნოებას ძალუძს, მქონდა რწმენის ყოვლისშემძლეობის შეგრძნება, საკურთხეველთან კი ღვთის უსაზღვრო სიდიადე სუფევდა... მივხვდი, რომ მმართავდა ვილაც, რომელსაც არ გააჩნდა საზღვრები, ჰქონდა შეუზღუდავი შესაძლებლობები, – ყოვლისშემძლე იყო და სიყვარულით აღსავსე... ვერ ვხედავდი, მაგრამ ნათლად, მთელი ჩემი არსებით შევიგრძნობდი და ვიცოდი, რომ ის იყო ჩემი მაცხოვარი ღმერთი!.. და რომ ის მერჩია თვით ჩემს სიცოცხლეს... მართლაც, ჩვენი ცხოვრება ქარის ქროლასავითაა და ჩვენი ყველაზე ცხოველი სურვილი ხომ ამ ცხოვრების ქრისტესადმი მორჩილებასა და სიყვარულში გატარებაა იმგვარად, რომ დარწმუნებული ვიყოთ, იმქვეყნიურ ცხოვრებაშიც რომ არ დავეშორდებით მას... ამიტომ, არაფერი იქნება ჩემთვის უფრო მტკივნეული, ვიდრე ის, რომ მასთან ზიარებაში არ ვიყო მუდამ... როგორც ყრმა იესოს მიმართავდა წმიდა ტერეზა: „მინიერი ტყვეობის შემდეგ, იმედი მაქვს, რომ სამშობლოში შენით ვიხარებ... მსურს, შენს სიყვარულში დავიხარჯო... შენი სიმაღლით მსურს, შევიმოსო და შენი მარადიული სიყვარულით ვიყო მოცული...“ და მართლაც, – „სხვა რა დასასრული უნდა იყოს ჩვენთვის, თუ არა მარადიულ სასუფეველში დამკვიდრება?!“ (წმ. ავგუსტინე)

როდესაც გავიგონე – „სხეული ქრისტესი!..“ – ვიგრძენი, მოახლოვდა საბედისწერო წამი მთელი ჩემი არსების გარდაქმნისა და ერთი სამყაროდან მეორეში გადასვლისა, სრულიად ახალი, ქრისტესმიერი ცხოვრების გაცნობისა... მივიღე იგი და დავადასტურე სიტყვით – „ამინ!“ თუმცა, შეკუმშული იყო ეს ყველაფერი დროში, მაგრამ უსასრულოდ დიდი თავისი რეალური მნიშვნელობით... მას შემდეგ, სულ სხვა თვალით ვუყურებ ყველაფერს და სულ სხვა გრძნობით ფეთქავს გული... გონებაში გაეღვებულ კითხვებზე თავისთავად ჩნდებოდა პასუხები... მილოცავდნენ... მასაწყურებდნენ... არასოდეს დამავინწყდება მათი მომღიმარი სახეები, თბილი და კეთილი გრძნობით აღსავსე თვალები... თავად გადარჩენილნი, ანთებულნი იყვნენ სხვისი გადარჩენის სურვილით... წირვის დამთავრებამდე, წინამძღვარმა – მამა ადამმა მოგვიხმო ზიარებულნი და უფლის სერობის ხატი გადმოგვცა ჩვენი სახელების მითითებითა და თავისი ხელმოწერით... დასასრულს კი ▶

## „INER-საქართველო“ ახალწიხეში

2012 წლის 30 მაისს, ქალაქ ახალციხეში გაიმართა არასამთავრობო ორგანიზაციის – „INER-საქართველო – წყვილისა და სიცოცხლის სამსახურში“ პრეზენტაცია. ორგანიზაციის წარმომადგენლებმა ფართო აუდიტორიას გააცნეს ოჯახის ბუნებრივი დაგეგმვის, ჩასახული სიცოცხლის დაცვისა და სხვა მიმდინარე პროექტები.

პრეზენტაციაზე მოწვეულთა შორის იყვნენ: ახალციხეში მოქმედი არასამთავრობო ორგანიზაციების წარმომადგენლები, სასულიერო პირები, რეპროდუქტოლოგები, გინეკოლოგები, სიმპტო-თერმული მეთოდის მასწავლებლები და სხვა სტუმრები.

ქუთაისის ოფისის ხელმძღვანელმა, ქალბატონმა ლალი ჩარკვიანმა დამსწრე საზოგადოებას გააცნო ორგანიზაციის დანიშნულებისა და მისი მუშაობის შესახებ საქართველოში და მის საზღვრებს გარეთ; მან ისაუბრა, თუ რა სახის დახმარება შეუძლია გაუწიოს ორგანიზაციამ წყვილებს, რომლებიც სიცოცხლეს აძლევენ დასაბამს. „ჩვენი მხრიდან, ის ინფორმაცია, რასაც ყველა დაინტერესებულ ქალბატონს და წყვილს ვაწვდით, ვიდრე მეთოდის ბაზისი გახდებოდეს, მათთვის უდიდესი დახმარებაა; ეს მოქმედება პირველადი და აუცილებელი პოზიციაა, რათა გამოჩნდეს მოტივირებული მიზეზები, რაც პარტნიორებში დაკვირვებისა და პატივისცემის სულისკვეთებას წარმოშობს სიცოცხლის მექანიზმებთან მიმართებაში“, – აღნიშნა მან.

ქალბატონმა ნინო ჟღენტმა წარმოადგინა ის პროგრამები, რომლებსაც „INER-საქართველო“ ჩვენს ქვეყანაში ახორციელებს პროექტის ფარგლებში და ისაუბრა მიმდინარე სოციალური დახმარების პროგრამებზე: „მშობელთა სკოლა“, „ჯანმრთელობის სკოლა“, საადვოკატო მომსახურება, ფსიქოლოგის კონსულტაციები. ყველა ეს სამუშაო განსაკუთრებით

მიმართულია ახალგაზრდებისადმი და მიზანმიმართულად ეხმარება მშობლებს შვილების აღზრდაში.

განსაკუთრებული ყურადღება დაიმსახურა ი. როცერის – განაყოფიერების ბუნებრივი მონესრიგების სიმპტო-თერმულმა მეთოდმა, რაც ამ ორგანიზაციის მუშაობაში პრიორიტეტს წარმოადგენს. საინტერესო იყო მეთოდის ექსპერტის, ქალბატონ ნანა ნებერიძის გამოსვლა, რომელიც ეხებოდა აბორტის, კონტრაცეფციისა და სიცოცხლის წინააღმდეგ მიმართულ სხვა საშუალებებს. „ბუნებრივ მეთოდებს აქვთ ორმაგი

ფუნქცია: გადაავადოს, თავიდან აიცილოს, ან გამოიწვიოს ორსულობა. ხოლო კონტრაცეპტული მეთოდი მოქმედებს ქალის ფერტილურობაზე, ანადგურებს მას; ორსულობის გადასავადებლად გამოყენებული კონტრაცეპტული მეთოდი იმ პერიოდს, რომელიც ბუნებამ წინასწარ შექმნა კავშირისათვის, არ გარდაქმნის რეპროდუქტოლოგიურად. ბუნებრივი მეთოდები კი აუმჯობესებენ წყვილთა

ფიზიკური, ემოციური, ფსიქოლოგიური და სულიერი კავშირის ხარისხს“, – აღნიშნა ნ. ნებერიძემ.

მანვე ისაუბრა ფერტილურობის ბუნებრივი მონესრიგების მეთოდზე, როგორც ქალისათვის უსაფრთხო, ჯანსაღ და ეფექტურ მეთოდზე. რომ ის გამართლებულია, როგორც ფიზიოლოგიური, ასევე რელიგიურ-მორალური თვალსაზრისით.

პრეზენტაციამ ინტერესი გამოიწვია დამსწრეთა შორის, რაც მათ მიერ დასმულ კითხვებში აისახა.

აღსანიშნავია ისიც, რომ ახალციხეში, უდესა და უნწაში ჩამოყალიბდა ჯგუფები, რომლებიც სწავლობენ და შემდეგ პრაქტიკაში იყენებენ დოქტორ იოსეფ როცერის სიმპტო-თერმულ მეთოდს.

**მამა ფიქრიშვილი**

◀ ტკბილი სუფრით გავვიმასპინძლდა, მერე ლოცვანი და ჯვრები დაგვირიგა...

გულწრფელი სიხარულით იზიარებდა ჩვენს სიხარულს თავად მამა ადამიც... მისი სახის გამომეტყველება სინმიდითა და მამობრივი მზრუნველობით იყო აღსავსე... სიმშვიდეს მგვრიდა მასთან სიახლოვე... ეს ხომ ბუნებრივია, რადგან იგი უფლის მსახურია და ჩვენი მოძღვარი, სულიერი მამა...

**P.S.** მსურს, უდიდესი მადლობა გადაუხადო ეკლესიას, რომელმაც მიიღო „მონანიე ცოდვილი“... ყოვლადსამღვდელოებას, რომელმაც აღასრულა უფლის ნება... დამსწრე კრებულს, რომელმაც იზეიმა „უძლები შვილის დაბრუნება“... და,

რა თქმა უნდა, მგალობელთა გუნდს, რომელმაც დაავიგრვინა ეს დღესასწაული „ღრუბლებიდან ღვთაებრივი გალობით“... და შევთხოვ უფალს, როგორც წმიდა ჟან მარი ვიანეი ლოცვისას: „უფალო, ერთადერთ წყალობას გთხოვ... მარადის მიყვარდე... თუ ჩემს ენას არ ძალუძს გამეორება, რომ მიყვარხარ, მსურს, რომ ჩემმა გულმა გაიმეოროს ეს ყოველი ძეგრისას...“

იესო კი მუდამ პასუხობს რწმენით აღსავსე გულის ვედრებას: – „მშვიდობით წადი, შენმა სარწმუნოებამ გაცხოვნა შენ!“

**თეკლა ჯუღაშვილი**



# უხედი რა ორპირში

2012 წლის 2 ივნისს ორპირის ეზო და სახლი ბავშვების ჟრიაშულმა და უფროსების ხალისიანმა ხმებმა გააცოცხლა. კიდევ ერთხელ შევიკრიბეთ წყვილები და არა მარტო წყვილები, რადგან შეხვედრის თემამ – „ბავშვების ქრისტიანული აღზრდა ოჯახში“ – დიდი ინტერესი გამოიწვია მათში, ვისაც შეხება აქვს პატარებთან, ან მომავალში ექნება.

საპატიო სტუმრის სტატუსით გვეწვია მამა ზიგმუნდი, რომელმაც ძალზე საინტერესოდ ისაუბრა და თეოლოგიურად განგვიმარტა ყველაფერი ის, რაც დიდაქტიურად და პედაგოგიურად უკვე აპრობირებული და გამართლებულია. საკუთარი აზრის დაფიქსირება და შეკითხვის დასმა ყველას შეეძლო, თუმცა შეხვედრის მონაწილეები, ერთეულების გარდა, მაინც პასიურობდნენ; ალბათ, მამა ზიგმუნდის მოსმენა ერჩიათ, თუმცა შეეძლოთ, მისგან საკუთარ კითხვაზე საინტერესო პასუხი მოესმინათ.

წავიკითხეთ ამონარიდი თემიდან – „ღვთის ძიებაში მყოფი ბავშვები“, სადაც აღნიშნულია, რომ თითოეული ბავშვი ღვთის საჩუქარია ადამიანისადმი, ღვთის სიტყვაა განხორციელებული. მშობელი კი ვალდებულია, ამ უნიკალურობას ანგარიში გაუწიოს. ეს კი ყოველთვის ასე არ ხდება, რითაც ილახება ბავშვის პიროვნული ღირსება, რადგან ის ცდილობს იმ ჩარჩოში მოქცევას, რასაც მისგან ითხოვენ. ამ დროს კი იკარგება მისი, როგორც ინდივიდის, თვითმ-



ყოფადობა. იგი ხდება მუდმივად სხვაზე დამოკიდებული და კომპლექსები უყალიბდება, კარგავს რეალობის გრძნობას და საკუთარი თავის შესახებ მხოლოდ სხვისი აზრი აინტერესებს. სულ სხვაა, როცა ბავშვი კითხვას სვამს, ცდილობს, აღმოაჩინოს საკუთარი თავი და შეიცნოს სამყარო; ეძებს პიროვნებას, ვისაც სრულად და უპირობოდ მიენდობა. სწორედ მფარველობისა და ნდობის ფაქტორი განაპირობებს ღვთის ძიების პროცესს. რადგან სხვაგვარად ისინი ბედის ანაბარად იქნებიან მიტოვებულნი, შიში გაუჩნდებათ და გაუჭირდებათ დამოუკიდებელ პიროვნებად ჩამოყალიბება. ბავშვებს სჭირდებათ ღმერთი, როგორც სტიმული, როგორც გამონევეა, სხვაგვარად ინდივიდებად ვერ ჩამოყალიბდებიან. არადა, ჩვენი მთავარი მიზანიც ხომ მათი სწორ გზაზე დაყენებაა. ნაკითხულმა მშობლები დააფიქრა, თუ როგორ შეიძლება დაეხმარონ პატარებს, როგორ მიანოდონ იფორმაცია ღმერთის არსებობაზე, როგორ შეარჩიონ საინტერესო ადგილები საბავშვო ბიბლიიდან, რომ მათთვის იოლად აღსაქმელი და მნიშვნელოვანი იყოს. ყველაფერი იმდენად მიმზიდველად და საინტერესოდ იყო მოწოდებული, პატარებიც კი დაინტერესდნენ, მერე კი, როცა დავალება – „როგორია ღმერთი თქვენს წარმოდგენაში და სად ცხოვრობს იგი“ – მიიღეს, ინტერესი გაუორმაგდა და მთელი სერიოზულობით დაფიქრდნენ. შემდეგ გვიპასუხეს კითხვებზე და ბოლოს, ჩვენს თხოვნაზე, ნახატებით გადმოეცათ თავიანთი წარმოსახვა, სიხარულით დაგვთანხმდნენ, დასხდნენ ხალიჩაზე და ხატვა დაიწყეს, ყველაზე უმცროსი მათ შორის სამი წლის იყო, ისიც ხატავდა... მერე სათითაოდ გამოვიდნენ და დარწმუნებით აგვიხსნეს, ისე დარწმუნებით, რომ მათ ნათქვამში „ექვს ვერ შეიტანდი“. ბავშვებმა თავიანთი ჩანაფიქრისა და აზრების რეალიზება მოახდინეს, ერთი შეხედვით ისეთი უმნიშვნელო დეტალებიც არ გამორჩენიათ, ხანდახან უფროსები რომ არ ვითვალისწინებთ.

პატარა ანასტასიამ ხატვა დიდი წრეებით დაიწყო, რაც იმით ახსნა, რომ ქვეყანა დიდია და ღმერთი ყველგან უნდა იყოსო. დარეჯანმა ფურცლის შევსება ვერ მოასწრო და მტკივნეულად განიცადა, რომ არ გამოუვიდა. მშობლებმა იგრ-



ძნეს, თუ რა სურდათ ბავშვებს და როგორ შეძლებდნენ, დახმარებოდნენ მათ ღვთის ძიებაში. ბავშვები, რადგან ერთხელ ჩაერთნენ უფროსების საქმეებში, აღარ „მოგვშორდნენ“ და ექსპრომტად კონცერტიც მოგვინყევს.

მხიარული განწყობა სადილზე და მის შემდეგაც გაგრძელდა, მერე ეზოში რომ ვერ „დაგვიტია“, ტყეში გადავწყიტეთ გასეირნება. ქალაქის ყოველდღიურობას შეჩვეულები, ტყეში ისე მიგვიზიდა, აღარ გვეთმობოდა იქაურობა. ქვები სკამებად გამოვიყენეთ, ტოტები – საჩრდილობლად, მთები და ღრუბლები – საცქერად. სახელდახელო სარბენი ბილიკებიც მოეწყო და მხიარული სტარტიც ავიღეთ. ჯერ პატარებმა გაგვამხიარულეს, მერე კი, სუორა ანა მარიას აქტიურობით, უფროსებიც გავეჯიბრეთ ერთმანეთს.

როგორც იტყვიან, მეგობრობამ და სიყვარულმა გაიმარჯვა.

სალამოც მოახლოვდა და ჩვენც წამოსასვლელად გავემზადეთ, თუმცა არც ერთმანეთთან და არც ორპირთან განშორება არ გვინდოდა.

ისევ დაებრუნდით ჩვენს ქალაქში და არ გვშორდებოდა ფიქრები მფარველ ანგელოზსა და მოსიყვარულე ღმერთზე, ხელს ალერსით რომ მოგვხვევს და ყველგან გვერდით დაგვიდგება.

ნინო ჟღენტო

საბა

16

# ქარწადლებული

„ვა, სოფელო, რაშიგან ხარ, რას გვაბრუნებ, რა ზნე გჭირსა. ყოვლი შენი მონდობილი ნიადაგმცა ჩემებრ ტირსა! სად წაიყვან სადაურსა, სად აღუფხვრი სადათ ძირსა?! მაგრა ღმერთი არ გასწირავს კაცსა, შენგან განაწირსა.“

შოთა რუსთაველის ეს სიტყვები გაგახსენდებათ, როდესაც გაეცნობით იმ ქართველი მონაზონის ცხოვრებას, რომლის შესახებაც ახლა მოგითხრობთ:

ევგენია ეფრიკაშვილი დაიბადა ქ. ახალციხეში, 1898 წელს. მამას, ალექსი ეფრიკაშვილს დუქანი ჰქონდა იღუმალაში; დედა, მარიამ აბულაძე, დიასახლისი იყო. მშობლებს, ევგენიას გარდა, ხუთი შვილი ჰყავდა. 1910 წელს, დედამ სამი შვილი – ევგენია, ნინა და ელზა – განათლების მისაღებად წმიდა მარიამის სახელობის სტამბულის მონასტერთან არსებულ ქალთა პანსიონში გაგზავნა. ისინი ჯერ ლათინურ-გერმანულ ჯგუფში სწავლობდნენ, შემდეგ ლათინურ-ფრანგულ ჯგუფში გადავიდნენ. გოგონები ნიჭიერები და ბეჯითები იყვნენ, ამიტომ ისინი პარიზის ღვთისმშობლის ტაძართან არსებულ პანსიონში წარგზავნეს. სამივე გოგონამ ბრწყინვალედ იცოდა ათი ენა: ქართული, ლათინური, ფრანგული, გერმანული, იტალიური, ბერძნული, რუსული, თურქული, სომხური, ესპანური. 15 წლის ევგენიამ გადამწყვიტა, თავისი ცხოვრება ღმერთისთვის მიეძღვნა. ამიტომ, სტამბულში დაბრუნებული, მონაზვნად აღიკვეცა და იწოდა



წმ. პეტრე და პავლე მოციქულთა ეკლესიაში

ბარნაბედ. იგი 16 წლისა იყო, როდესაც მამა გარდაეცვალა. დედამ ახალციხის ბავშვთა სახლში დაიწყო მუშაობა აღმზრდელად. 1918 წელს ნინა და ელზა საქართველოში დაბრუნდნენ. მალე ნოე ჟორდანიამ და ნოე რამიშვილმა განაცხადეს, რომ ესაჭიროებოდათ ფრანგულის მასწავლებელი. გუვერნანტებად შერჩეულ იყვნენ ნინა და ელზა, რადგან მათ განათლება მიღებული ჰქონდათ პარიზში. ნინა მიიღეს ნოე რამიშვილის, ხოლო ელზა – ნოე ჟორდანიას ოჯახში. როდესაც საზღვრები იკეტებოდა, ნინამ წერილი გაუგზავნა ევგენიას თურქეთში, რომ დაბრუნებულიყო საქართველოში. ამ დროისათვის მონაზონი იტალიაში იმყოფებოდა. თურქეთში დაბრუნებულმა, წერილი წაიკითხა, მაგრამ უკვე გვიან იყო – საზღვრები ჩაკეტილი დახვდა.

თავდაპირველად სამშობლოდან მოშორებულ გოგონას მიწერ-მოწერა ჰქონდა ოჯახთან. მაგრამ საბჭოთა პერიოდში უცხოეთში მიმონერა მკაცრად კონტროლდებოდა. დასჯის საფრთხე ემუქრებოდა იმ ოჯახს, რომლის რომელიმე წევრიც წერილს გაავრცელებდა საზღვარგარეთ. ამიტომ ერთ-ერთ წერილში მონაზონს უმცროსმა დამ, ქსენიამ მისწერა, მე „მოვკვდიო“. ევგენია ჭკვიანი გოგონა იყო, ყველაფერს მიხვდა და წერილების გაგზავნა შეწყვიტა.

ევგენია მიხვდა, რომ საქართველოში ვეღარ დაბრუნდებოდა. გოგონა ბევრს ლოცულობდა ახლობლებისთვის, ღმერთს ევედრებოდა, სამშობლოში დაებრუნებინა, იმედს არ კარგავდა, რომ ერთ მშვენიერ დღეს მოახერხებდა ოჯახისა და ნათესავების ნახვას. ამიტომ იგი მუდამ წერილებს წერდა თავისთვის და კითხულობდა წმინდა მარიამის სახელობის სტამბულის მონასტრის ბიბლიოთეკაში არსებულ ქართულ ლიტერატურას, რათა მშობლიური ენა არ დაევიწყებოდა.

რამდენიმე წლის შემდეგ, ბარნაბემ მოღვაწეობა განაგრძო პარიზის ღვთისმშობლის ტაძარში. აქაც მოძებნა ლიტერატურა მშობლიურ ენაზე. ტაძრის ბიბლიოთეკაში ქართული წიგნებიც იყო,



ამიტომ ხშირად სტუმრობდა მას.

ევგენიამ მხოლოდ 1966 წლიდან განაახლა მიწერ-მოწერა ნათესავებთან.

ბარნაბეს მოვლილი ჰქონდა ლურდის წმინდა ადგილები.

ევგენია საქართველოში ორჯერ იყო ჩამოსული: პირველად – 1969 წელს, მეორედ – 1972 წელს.

სამშობლოში დაბრუნებული მონაზონი დამ, ნინამ და ნათესავებმა მშობლიურ ახალციხეში წაიყვანეს. აწყურში, სასაზღვრო ზონის გავლისას, მესაზღვრეებმა ასაკოვან ქალბატონებს საბუთები არ შეუმოწმეს. ახალციხეში ჩასულებს, მეორე დღეს თავს დაადგნენ სუკ-ის თანამშრომლები. გულდასმით შეუმოწმეს საბუთები უცხოეთიდან ჩამოსულ ევგენიას, მაგრამ ვინაიდან მას ყველაფერი წესრიგში ჰქონდა, თავი დაანებეს.

ევგენიამ თან ჩამოიტანა ფრანგულ ენაზე ნაბეჭდი ორი სქელტანიანი წიგნი. ერთ-ერთი მათგანი ლურდის ღვთისმშობლის სასწაულებს ეხებოდა.

სამშობლოში დაბრუნებულ ევგენიას ძმამ, პავლემ, შესთავაზა, დარჩენილიყო საქართველოში საცხოვრებლად, მაგრამ მან უპასუხა, რომ თუ ჩემს სულიერ დებსაც ჩამოიყვანთ, მაშინ დავრჩები, ვინაიდან მისთვის აქაური გარემო უკვე სრულად უცხო იყო.

თბილისში ყოფნისას, ევგენიამ წმიდა პეტრე და წმიდა პავლე მოციქულთა კათოლიკური ეკლესია მოინახულა; ესაუბრა მამა კონსტანტინე საფარაშვილსა და მამა იან სნეფინსკის.

მოხდა ერთი კურორტული ამბავი: ევგენიამ დაინახა, როგორი წვალებით ამზადებდნენ ჭანჭურის ჯემს ნათესავები.

საბა

17





დებთან ერთად

შეეცოდა ისინი და თქვა, ვილოცებ, რომ ამ ხემ შემდეგ წელს ნაყოფი არ გამოიღოსო. რაოდენ გასაკვირიც არ უნდა იყოს, მართლაც ასე მოხდა. გაოცებულმა ნათესავებმა ევგენიას შეუთვალეს, ელოცა, რომ ხეს კვლავ გამოეღო ნაყოფი. რა თქმა უნდა, მონაზონმა თხოვნა შეუსრულა ახლობლებს.

ერთხელ ევგენიამ, ახლობლებთან საუბრისას, ახსენა, რომ პარიზის ღვთისმშობლის ტაძარში არსებობდა 1910 წელს ფრანგულ ენაზე დაბეჭდილი მიხეილ თამარაშვილის წიგნი „საქართველოს ეკლესიის ისტორია დასაბამიდან დღემდე“. დის შვილიშვილმა, მადონა გოგოლაძემ მას უთხრა, რომ დიდ მამულიშვილურ საქმეს გააკეთებდა, თუ მოახერხებდა მის გამოგზავნას საქართველოში. უცნობია, როგორ მოაგვარა მონაზონმა ეს საკითხი, მაგრამ ზემოთ აღნიშნული წიგნი მან მართლაც გამოგზავნა სამშობლოში. მის ახლობლებს რამდენიმე დღით ჰქონდათ წიგნი სახლ-

ში, შემდეგ კი ჩააბარეს ახალციხის სახელმწიფო მუზეუმს.

ნათესავებმა ევგენიას დაათვალიერებინეს ვარძია. უცხოეთიდან ჩამოსული ქართველი მონაზვნის პატივსაცემად, საეკლესიო გუნდმა იგალობა ვარძიის ღვთისმშობლის მიძინების ტაძარში.

ბარნაბე მივლინებული იყო ვატიკანში. იგი რომის პაპს, პავლე VI-ს შეხვდა. არსებობს ფოტოსურათი, სადაც პაპი ხელს ართმევს მას. თუ ეს სურათი ვინმეს აქვს შენახული, ვთხოვ, სკანერის საშუალებით გადაიღოს მისი ასლი და გამომიგზავნოს ამ მისამართზე: [mgikoshvili@yahoo.com](mailto:mgikoshvili@yahoo.com)

1973 წელს ბარნაბეს მონაზვნობის 60 წლის იუბილე მიულოცა რომის პაპმა პავლე VI-მ.

ევგენია ეფრიკაშვილი გარდაიცვალა 1985 წლის ნოემბერში. დაკრძალულია მარსელიდან აღმოსავლეთით, 20 კმ-ში მდებარე დაბა ჟემენოში.

მანანა გიქოშვილი

## ეკუმენური გვერდი

# ევროპის კათოლიკეთა და მართლმადიდებელთა შესაშუ ფორუმი

ევროპის მართლმადიდებელი და კათოლიკე ეკლესიების მიტროპოლიტები და ეპისკოპოსები ერთსულოვნად შეთანხმდნენ შეხვედრაზე, რომელიც ჩატარდა ლისაბონში, ა.წ. 5-8 ივნისს. შეხვედრაზე საუბარი შეეხო ეკონომიკურ კრიზისს და სიღატაკის პრობლემას. „კათოლიკეთა და მართლმადიდებელთა ევროპულ ფორუმში“ დელეგაცია ორივე მხრიდან იყო წარმოდგენილი: სასიმის (Sassima) მართლმადიდებელი მიტროპოლიტი გენადიუსი (მსოფლიო საპატრიარქო); ესპანეთისა და პორტუგალიის მიტროპოლიტი პოლიკარპე (მსოფლიო საპატრიარქო) და მოსკოვის, სერბეთის, რუმინეთის, საქართველოს, კვიპროსის, პოლონეთისა და ალბანეთის საპატრიარქოს წარმომადგენლები; ასევე წარმოდგენილი გახლდათ კათოლიკური მხარე. დელეგაციას მეთაურობდა კარდინალი პეტერ ერდო, ბუდაპეშტ-ესტერგომის (Esztergom-Budapest) მთავარეპისკოპოსი; ევროპის ეპისკოპოსთა კონფერენციის საბჭოს პრეზიდენტის წარმომადგენლები, რომელთა შორის გახლდათ მონსინიორ თადეუშ კონდრუშევიჩი, მინსკის მთავარეპისკოპოსი (ბელორუსია); მონსინიორ პაოლო პეცი, მოსკოვის ღვთისმშობლის სახელობის ეპარქიიდან და მონსინიორ მანსუეტო ბიანკი, პისტოიას ეპისკოპოსი.

დღის განრიგი შედგენილი იყო ლოცვისა და სამუშაო პროცესის მონაცვლეობით. კათოლიკეთა და მართლმადიდებელთა პირველი ევროპული ფორუმი გაიმართა 2008 წელს, იტალი-

აში, ქ. ტრენტოში, თემაზე: „ოჯახი – კაცობრიობის სიკეთე“, II ფორუმი კი 2010 წელს, საბერძნეთის კუნძულ როდოსზე, თემაზე: „ეკლესიისა და სახელმწიფოს ურთიერთობა“.

ფორუმში დახურულ კარს მიღმა წარმართა, მაგრამ გარეთ დარჩენილ ადამიანებში საკუთარი ხალხის გაჭირვებაზე საუბრის დიდი სურვილი იგრძნობოდა. „საბერძნეთში, – განაცხადა მიტროპოლიტმა გენადიუსმა, – პოლიტიკოსებმა დაკარგეს თავიანთი ხალხის ნდობა. მრავალი ადამიანი გაფიცულია, მრავალმა დაკარგა სამსახური, მრავალში გაქრა ყოველგვარი იმედი და ბევრი თვითმკვლელობამდეც კი მივიდა. ეკლესია იზიარებს მათ ტანჯვას“.

რთული ვითარებაა პორტუგალიაში: „გაჭირვებულები, – განაცხადა ლისაბონის კათოლიკე პატრიარქმა, ხოსე კრუზმა, – არიან ისინი, რომლებიც ყველაზე დიდ საფასურს იხდიან. მთავარი პრობლემა სამუშაოს არარსებობაა. ჩვენთან უმუშევრობამ ჯერ არნახულ ზღვარს მიაღწია. გასულ წლამდე უმუშევრების რიცხვი 10% იყო, ამჟამად კი 16%-ია“.

„უნგრეთში, – გვაუწყებს ბუდაპეშტ-ესტერგომის მთავარეპისკოპოსი, კარდინალი პეტერ ერდო, – საშუალო ხელფასი ძლივს აღწევს რიგითი გერმანელის ხელფასის 20%-ს, მაშინ როცა სამომხმარებლო საქონლის ფასები თანაბარია“.

შექმნილ ვითარებას ორივე მხარე ერთნაირად აფასებს და აანალიზებს; მართლმადიდებლები და კათოლიკეები ასევე



ერთსულოვნად ასახელებენ ამჟამინდელი კრიზისის წარმომშობ მიზეზებს. ისინი არ არიან ეკონომისტები, მაგრამ რეალობას განსხვავებული თვალთი უყურებენ, ვიდრე ფინანსისტები და ეკონომიკის ექსპერტები. ამტკიცებენ, რომ საფრთხეშია არა საფინანსო ბირჟა, არამედ „ადამიანის გული“, რამეთუ ეს კრიზისი იმ სამომხმარებლო და საფინანსო კულტურის მემკვიდრეა, რომელიც ყოველმხრივ ცდილობს, „პროდუქტებით შეავსოს არსებობის სიცარიელე“, ცხადია, წარუმატებლად. მთავარეპისკოპოსი ათენაგორას სინოპელი (მსოფლიო საპატრიარქო) ხაზგასმით აღნიშნავს: „ჩემს სამშობლოში, ბელგიაში, ყოველდღე, დაახლოებით ექვსი ადამიანი იკლავს თავს. ადამიანები მარტოობის გამო იღუპებიან. როგორც არასდროს, ისე სჭირდება ხალხს სიცოცხლის აზრის შეცნობა“.

გამოსავალი?... ეპისკოპოსებსა და მიტროპოლიტებს საკმაოდ ნათელი იდეები აქვთ. ეკონომიკის ცენტრში უნდა დადგეს ადამიანი, რაც ნიშნავს ისეთი ეკონომიკური დინამიკის განვითარებას, როცა საჯარო გაჭირვებაში ანგარიში არ გაენევა მხოლოდ მცირეთა – საბირჟო თუ დიდი მულტინაციონალური კომპანიების – ინტერესებს. მეორე გზა არის ფინანსების შემცირება რეალურ ეკონომიკაში და განსაკუთრებით მომსახურების სფეროში. შემდეგ უმუშევრობის გლობალური პრობლემა, რამეთუ ის ფაქტი, რომ ევროპაში მილიონობით ადამიანია უმუშევარი, გაცილებით სერიოზულია იმ ფინანსურ ზრდასთან შედარებით, რომლის ინტერესში მხოლოდ საფინანსო ბირჟა და მოსახლეობის უმცირესი ნაწილი შედის.

ეკლესია ხმას მხოლოდ სიღატაკისა და ეკონომიკური კრიზისის გამო არ იმაღლებს. არის მსოფლიოში ისეთი ქვეყნები, სადაც მენარმეობის ალტერნატიულ ფორმებს მიმართავენ; ეს ის სამყაროა, რომელიც არსებობს და რომელიც უნდა გავიცნოთ. ეს ქვეყნები ქრისტიანული კულტურით არის ნაკვები და დღეს ისინი უმკლავდებიან ეკონომიკურ კრიზისს.

რამდენიმე ამონარიდი სიმპოზიუმის ზოგიერთი მონაწილის ინტერვიუდან: კარდინალი პეტერ ერდო, ევროპის ეპისკოპოსთა კონფერენციის საბჭოს პრეზიდენტი: „შეხვედრის მთავარ მიზნად არ დავგისახავს ტექნიკური გამოსავლის ძიება, არამედ ჩვენს რწმენაზე დამყარებული პასუხების მოძიება, ვინაიდან ნათელია, რომ ეკონომიკური კრიზისისა და სიღატაკის პრობლემასთან გასამკლავებლად კათოლიკე და მართლმადიდებელ ეკლესიას ერთნაირი ბაზა აქვს. ჩვენ დავინახეთ, რომ ეკონომიკა მხოლოდ მათემატიკური ტექნოლოგიის, ან აბსტრაქტული ფინანსების ბაზაზე არ უნდა არსებობდეს, მას ძლიერი კავშირები უნდა ჰქონდეს, პირველ რიგში, რეალურ ეკონომიკასთან.... ჩვენ რეალობიდან მოწყვეტის საშიშროების წინაშე ვდგავართ: რეალური ეკონომიკიდან მოწყვეტილი ფინანსები; რეალური ეკონომიკა, რომელიც სახელმწიფოსგან და საზოგადოებისგან გამიჯნულია; პიროვნება, სახელმწიფო და საზოგადოება ერთმანეთისაგან გამიჯნულია. ამგვარი „გამიჯვნები“ რომ დავძლიოთ, კარდინალი აუცილებლობად მიიჩნევს, რომ გაძლიერდეს „ოჯახი, როგორც სოციალური ინსტიტუტი, სადაც პიროვნებას განუვითარდება პასუხისმგებლობის უნარი, ისწავლის სხვის პატივისცემასა და სიყვარულს“. ამასთანავე, უფრო მეტად უნდა დაფასდეს „ადამიანის შრომა, როგორც კეთილდღეობის წყარო და ნიშანი“, და „გაღრმავდეს ჩვენი პასუხისმგებლობა საზოგადოების წინაშე“. „ამჟამინდელი კრიზისი ყველა ადამიანში უნდა იწვევდეს პასუხისმგებლობის გრძნობას. საზოგადოება პიროვნებაზე მალა აყენებს ეკონომიკურ ინტერესებს. კრიზისის საფუძველში „დევს ძირეული მიზეზები“, – განაცხადა კარდინალმა ერდომ, და მიაწინა ეკონომიკის განვითარების ახალი მოდელის შექ-

მნის აუცილებლობაზე, რომელიც გაამყარებს „ავთენტუკურ ქრისტიანულ ცხოვრებასა და ეკონომიკურ სამყაროს შორის არსებულ კავშირს“. „ღრმად გვაქვს შეგნებული, რომ ამჟამინდელი ეკონომიკური დეგრადაცია, რაც საზოგადოების მონყობის მოდელს ეჭვქვეშ აყენებს, აისბერგის ერთი წვერია, და რომ გაცილებით ღრმაა მისი ძირი. ამ კონტექსტში, – დასძინა მან, – პოლიტიკა და ეკონომიკა, ასევე ტექნოლოგია, არ დგას პიროვნებისა და მისი სიკეთის სამსახურში, ან არაადამიანურ ხასიათს იძენს და ნაცვლად იმისა, რომ ადამიანს ბედნიერება მოუტანოს, ანადგურებს მას“. „სწორედ ამიტომ, – დაასკვნა მან, – პიროვნება ვერასდროს განიხილება უბრალო ციფრად, ან სხვა მიზნის მისაღწევ საშუალებად; ადამიანს, როგორც არ უნდა იყოს მისი წარმოშობა, ან სოციალური მდგომარეობა, უნდა მოვეპყროთ, როგორც ღირსეულ პიროვნებას“. ამდენად, ევროპის ეპისკოპოსთა თავმჯდომარის აზრით, კრიზისის დასაძლევად განსაკუთრებით საჭიროა „სიყვარულის ხელახალი შესწავლა“. მხოლოდ და მხოლოდ „სიყვარულის ეკონომიკას“, – დაზუსტა მან, – რომელიც ემსახურება ადამიანს, საზოგადოებას, ძალუძს ამ რთულ სიტუაციასთან გამკლავება“.

ესპანეთისა და პორტუგალიის მიტროპოლიტის, პოლიკარპეს აზრით, „ვერ შევძლებთ რეალურ განვითარებას და ვერ მოვიპოვებთ სიმშვიდეს, თუ ღმერთს, ყოველი სიკეთის ერთადერთ წყაროს, დავშორდებით. ასეთ შემთხვევაში მხოლოდ ჯუნგლების კანონი მოქმედებს. ჩვენ აპოსტასურ ეპოქაში ვცხოვრობთ და ეკონომიკური კრიზისი ჩვენს გამოცდად უნდა ჩავთვალოთ, რომელიც გვიხმობს ღვთის განგებულებაში, ადამიანთა კეთილი და ერთგული მეგობრის მკლავებში დასაბრუნებლად“. „ქრისტიანული ფესვების გარეშე დარჩენილ ევროპას, – განაცხადა მიტროპოლიტმა, – მომავალი არა აქვს. ბევრს ცდილობდნენ და კვლავაც ცდილობენ, თუმცაღა წარუმატებლად, ევროპის გაერთიანებას, განსაკუთრებით ეკონომიკური თვალსაზრისით. ელემენტი, რომელიც ევროპას აერთიანებს, არის არა ევრო, არამედ უკვდავი ქრისტიანული და ბერძნულ-რომაული სული, როგორც მრავალგზის აღუნიშნავთ ეს ერთიანი ეკლესიის მამებს“.

მონსინიორ დუარტე და კუნა, Ccee-ს (Consilium Conferentiarum Episcoporum Europae – ევროპის ეპისკოპოსთა კონფერენციის საბჭო) გენერალური მდივანი, აცხადებს, რომ კრიზისის დასაძლევად საჭიროა ურთიერთგაგება, რომელიც ტექნიკურ ანალიზზე მეტია. „მნიშვნელოვანია, ქრისტიანებმა ერთად იმსჯელონ ამჟამინდელ ეკონომიკურ-ფინანსურ კრიზისზე და ჩაწვდნენ ამ კრიზისის ფესვებს, რათა გაიგონ, რამდენად ძალუძთ ერთობლივი თანამშრომლობა ამ სიტუაციიდან ხალხისა და საზოგადოების გამოსაყვანად. შევეცადოთ, რომ ქრისტეს დარად დავდგეთ ისტორიის შუაგულში“. მონსინიორ კუნა თვლის, რომ კათოლიკეთა და მართლმადიდებელთა ევროპული ფორუმის მიზანია, „ერთად შეკრიბოს კათოლიკეები და მართლმადიდებლები, რათა იმსჯელონ იმ სოციალურ და საეკლესიო თემებზე, რომელთაც ადგილი აქვთ საზოგადოების ცხოვრებაში“.

მიტროპოლიტმა გენადიუსმა აღნიშნა, რომ „პატრიარქი ბართოლომეო, რამდენადაც პირველი სულიერი ლიდერია მართლმადიდებელ პრიმატებს შორის, დიდ ყურადღებას უთმობს ნებისმიერ „დიალოგს“, რომელსაც ხორცი ესხმება ქრისტიანულ ეკლესიებში, და განსაკუთრებით, კათოლიკეთა და მართლმადიდებელთა საერთაშორისო თეოლოგიურ დიალოგს, ასევე, აქტუალურ ევროპულ ფორუმს, რომელიც ღვთის კურთხევით თავის მესამე თავყრილობამდე მივიდა“.

L'osservatore Romano



# საერთაშორისო თეოლოგიური კონფერენცია

## იერუსალიმის მნიშვნელობაზე ქრისტიანულ თეოლოგიასა და საეკლესიო პრაქტიკაში

საქართველოში, ლათინური წესის კათოლიკე ეკლესიის ინიციატივით, 6 და 7 ივნისს კიდევ ერთი საერთაშორისო მასშტაბის საინტერესო სამეცნიერო-თეოლოგიური ფორუმი ჩატარდა თემაზე: „**იერუსალიმის (სიონის) მნიშვნელობა ადრექრისტიანული ეკლესიის თეოლოგიასა და საეკლესიო პრაქტიკაში (I-VIII საუკუნეები)**“. იერუსალიმის მნიშვნელობასა და როლზე მსჯელობა ქრისტიანული, და არა მხოლოდ ქრისტიანული, საეკლესიო სინამდვილისათვის ახალი არ არის და გადაუჭარბებლად შეიძლება ითქვას, რომ ეს თემა არც არასდროს დაკარგავს ინტერესსა და აქტუალობას კაცობრიობისათვის.



სამი ათასი წლის წინ წარმოთქმული ფსალმუნის ფრაზა, – „თუ დაგივიწყო იერუსალიმი, დამივიწყოს მარჯვენამ ჩემმა“, – ახლაც არ კარგავს აქტუალობას.

იერუსალიმში ქრისტიანული აღმსარებლობის თითქმის ყველა ეკლესიას აქვს თავისი წარმომადგენლობები, ტაძრები და მონასტრები. წმინდა მიწაზე წარმოდგენილი მრავალი მისიის წევრები თეოლოგიური, სამეცნიერო და კვლევითი საქმიანობითაც არიან დაკავებული. აქ თავისი მეცნიერული საქმიანობით ყველაზე მრავალრიცხოვანი და გამორჩეული...რომის კათოლიკე ეკლესია

და მისი სასულიერო ორდენებია. ამ ორდენებში მოღვაწე სასულიერო პირები ნაყოფიერად უთავსებენ ერთმანეთს ღმრთისმსახურებას, უშუალოდ საეკლესიო საქმიანობასა და სამეცნიერო კვლევებს. ამიტომ ნებისმიერი სამეცნიერო-თეოლოგიური ფორუმის ორგანიზატორები, მით უმეტეს, თუ ეს ფორუმი იერუსალიმსა და საეკლესიო პრაქტიკაში მის როლს ეხება, ცდილობენ იერუსალიმში მეცნიერებაში მოღვაწე კათოლიკე სასულიერო პირების მოწვევას. იერუსალიმის მნიშვნელობისადმი მიძღვნილი თბილისის საერთაშორისო თეოლოგიური კონფერენციაც მნიშვნელოვანი გახლდათ იმიტომაც, რომ მასში, ქართველ და დასავლეთ ევროპელ მკვლევარებთან ერთად, იერუსალიმიდან მოწვეული მეცნიერებიც მონაწილეობდნენ.

იერუსალიმის თემატიკაზე ორგანიზებული თბილისის კონფერენცია წარმოადგენს საერთაშორისო თეოლოგიური კონფერენციების ციკლის გაგრძელებას, რომელიც დაიწყო 2009 წელს, თემით: „ასურელი მამები“ და გაგრძელდა 2010 წელს – „კაბადოკიელი მამები“. პირველ კონფერენციაზე ნაკითხულ მოხსენებათა კრებული გასულ წელს გამოიცა წიგნის სახით. გასულ წლებში სამეცნიერო-თეოლოგიური კონფერენციების ორგანიზატორ-მასპინძლები იყვნენ: ილიას სახელმწიფო უნივერსიტეტი, სულხან-საბა ორბელიანის სახელობის სასწავლო უნივერსიტეტი, რომის კათოლიკე ეკლესია საქართველოში და ევანგელურ-ლუთერული ეკლესია. წელს მათ ევანგელურ-ბაპტისტური ეკლესიაც შეუერთდა.

**„ამ წამოწვევის მიზანი მხოლოდ აკადემიური ინტერესი არ არის. ასეთი კონფერენციები ხელს უწყობს ადრექრისტიანული თეოლოგიის საფუძველზე აწყობილ ინტერ-დენომინაციურ დიალოგს საქართველოში“, –** აცხადებენ ორგანიზატორები. რაც შეეხება ფინანსურ მხარეს, მნიშვნელოვანი როლი ითამაშა საქართველოს სახალხო დამცველთან არსებულმა ტოლერანტობის ცენტრმა (ამ ცენტრის წევრები არიან აქ დასახლებული ეკლესიები), აგრეთვე ამერიკის შეერთებული შტატების საერთაშორისო განვითარების სააგენტომ (USAID), საქართველოს გაეროს ასოციაციამ (UNAG), რომლის პროექტის – „ეროვნული ინტეგრაციის გაძლიერება“ – (ANI) ფარგლებშიც მოხდა კონფერენციის ბიუჯეტის გარკვეული ნაწილის დაფინანსება.

კონფერენცია ილიას სახელმწიფო უნივერსიტეტის, აზია-აფრიკის ინსტიტუტის სააქტო დარბაზში ჩატარდა. მონაწილეებსა და დამსწრე საზოგადოებას მიესალმნენ: უნივერსიტეტის რექტორი, პროფესორი გიგი თევზაძე; მამა გაბრიელე ბრაგანტინი – რომის კათოლიკე ეკლესია; ეპისკოპოსი რუსუდან გოცირიძე – საქართველოს ევანგელურ-ბაპტისტური ეკლესია; ეპისკოპოსი ჰანს იოაჰიმ კიდერლენი – ევანგელურ-ლუთერული ეკლესია და პროფესორი ვაჟა ვარდიძე – სულხან-საბა ორბელიანის სასწავლო უნივერსიტეტის რექტორი.

ოფიციალური ნაწილის შემდეგ, პირველი მოხსენებით, თემაზე: „იერუსალიმის როლი რომის ეკლესიისათვის I-V საუკუნეებში“, გამოვიდა იერუსალიმის დომენიკელთა ორდენის მონასტრის მღვდელმსახური, ცნობილი მკვლევარი, პროფესორი, **მ. ნიკოლას-ჟან პერეტი**, რომელიც მამა პიერ დიუმულენმა წარადგინა. მოხსენებამ, რომელიც მდიდარი ვიზუალური მასალის დემონსტრირების ფონზე ხდებოდა, და რომელსაც შესანიშნავ სინქრონულ თარგმანს უწევდა ვასილ კობახიძე, გულგრილად არ დატოვა მსმენელები.

მეორე მოხსენება გახლდათ „უფალს სურს, რომ ვიმოგზაუროთ – ქრისტიანული ტოპოგრაფიის ელემენტები IV საუკუნეში“, მომხსენებლები: გერმანელი მეცნიერი, პროფესორი **ანდრეას მიულერი** და დოქტორი **დანიელ მურკუიუანესი**.

მოსხენებებით გამოვიდნენ ქართველი მკვლევრებიც: ილიას უნივერსიტეტის პროფესორი **ექვთიმე კოჭლამაზაშვილი** – „უძველესი ქართული ევლოგიონი“ და საქართველოს ტექნიკური უნივერსიტეტის პროფესორი, ისტორიის დოქტორი **ნუგზარ ბარდაველიძე** – „იერუსალიმი – ქრისტიანული პი-

ლიგრიმობის სათავეებთან“.

კონფერენციის მეორე დღეს მოხსენებებით გამოვიდნენ იტალიელი პროფესორი **სილვო ბარბალია** – „ხელახალი ანალიზი მესიის დამოკიდებულებისა წმინდა ქალაქთან“; გერმანელი პროფესორი **მარტინ ტამკერი** – „იერუსალიმი ყველგანაა“ (მაკარიოსის სწავლებაზე დაყრდნობით). აგრეთვე ქართველი მეცნიერი, პროფესორი **ლილი ხევსურიათი**, ქართული საზოგადოებისათვის საინტერესო მოხსენებით – „იოანე ზოსიმეს კალენდრის წყაროები“.

კონფერენცია დასრულდა ეპისკოპოს **ჰანს-იოაჰიმ კიდერლენის** მოდერაციით ჩატარებული „მომხსენებლების პოდიუმი“-თ, რომლის დროსაც საინტერესო, ხანგრძლივი დისკუსია გაიმართა მსმენელთა ფართო აუდიტორიის აქტიური თანამონაწილეობით. ამ დისკუსიის დროს, გამოიკვეთა ქართული საზოგადოებისათვის საკმაოდ აქტუალური საკითხები. კონფერენციის ორგანიზატორებმა და მონაწილეებმა გამოთქვეს აზრი, რომ მომავალი კონფერენციის თემა ამ სურვილები-სა და ინტერესების შეჯერების გათვალისწინებით დაიგეგმოს. ასევე გადაწყდა, რომ გაერთიანდეს წლევედელი და 2010 წლის კონფერენციაზე წაკითხული მოხსენებები და მიმდინარე წელსვე ერთ კრებულად გამოიცეს.

**ვუსურვით მშვიდობა იერუსალიმს!** – მონაწილეთა ამ მოწოდებით დამთავრდა ეს საერთაშორისო კონფერენცია და დარბაზში მყოფნიც ერთხმად შეუერთდნენ 121-ე ფსალმუნში გახმანებულ ამ მარადიულ მოწოდებას.

კორნელი დენტი

## ხორვატი კათოლიკეები და სერბი მართლმადიდებლები წარსულის „იარაგის“ მოსაუზუნებლად

„პატივისცემითა და პასუხისმგებლობის გრძნობით დაფიქრებაა საჭირო წარსულის ყველა მოქმედებაზე“, რამეთუ „მხოლოდ ასე შეიძლება იარების მოშუშება და მომავლისთვის თვალის მშვიდად გასწორება“, – წერენ სერბეთის მართლმადიდებელი ეკლესიის წინამძღოლი, პატრიარქი ირენო და ზაგაბრიის მთავარეპისკოპოსი, კარდინალი იოსებ ბოზანიკი კომუნიკეში, რომელიც მიიღეს ზაგაბრიაში, 8 ივნისს სერბეთის მართლმადიდებლური ეკლესიის წმიდა სინოდის რამდენიმე წევრისა და ხორვატიის საეპისკოპოსო კონფერენციის წარმომადგენლების შეხვედრაზე.

„შეხვედრის მონაწილეებს, როგორც მორწმუნეთა და თავიანთი ქვეყნის მოქალაქეთა მწყემსებს, შეგნებული აქვთ, რომ წარსულის შესახებ მრავალი კითხვა კვლავ რჩება შემაფერხებელ გზად“; ამიტომ დასძენენ: „აუცილებელია, რომ, როგორც არასდროს, ნათელი მოეფინოს მოვლენებს, რასაც ჯერ კიდევ საკმარისი გულისხმიერებით არ ეკიდება საზოგადოება, როგორც ხორვატიაში, ასევე სერბეთში“. აქედან გამომდინარე, ეპისკოპოსებმა „მხარდაჭერა“ აღმოუჩინეს ყველა კომისიას, რომელიც იძიებს კომუნიკურ რეჟიმის კრიმინალურ ფაქტებს და ამ რეჟიმის მსხვერპლთა სამარხები საზეიმო ვითარებაში ყვავილებით შეამკეს.

კომუნიკეში ასევე გაცხადებულია საგულისხმო მოწოდება: „სოციალური და პოლიტიკური ცხოვრების პასუხისმგებელი პირების მიმართ. ასევე ყველა იმ ადამიანის მისამართით, ვისაც რაიმე ინფორმაცია მოეპოვება გასული საუკუნის ოთხმოცდა-

ათიანი წლების ბრძოლებში დაღუპულ პირებზე, რომლებიც ჯერ კიდევ დაკარგულად ითვლებიან, რათა დაეხმარონ მათ მოძებნაში, ან მიაწოდონ ინფორმაცია მათი საფლავების შესახებ“. „ეს საოცრად ადამიანური და გულისხმიერი ნაბიჯია იმ ოჯახების დასახმარებლად, – წერენ კათოლიკე და მართლმადიდებელი ეპისკოპოსები, – რომლებიც, აგერ უკვე ოცი წელია, ისევ ტკივილით ცხოვრობენ... ყველას მიმართ, ვინც გლოვასა და მწუხარებაშია, ეპისკოპოსები არა მხოლოდ თანაგრძნობას გამოხატავენ, არამედ პირდებიან მათ თანადგომას, ქრისტიანულ მხარდაჭერას და მათი მწუხარების გაზიარებას“. წარსულის იარების მოშუშების პროცესი უნდა მიმდინარეობდეს „სამართლითა და თანასწორუფლებიანობით“, აქედან გამომდინარე, ეს თემა უნდა განიხილოს „სახარების შუქზე“. კომუნიკეს დასკვნით ნაწილში გამოხატულია სურვილი იმისა, რომ ზაგაბრიის შეხვედრა „არის ორივე ეკლესიის საერთო ძირითადი ქრისტიანული ფასეულობების დამოწმება“.

შეხვედრის დასასრულს, პატრიარქმა კარდინალს უსახსოვრა ჯვარი; ასეთ ჯვარს სერბეთის მართლმადიდებლური ეკლესია, ჩვეულებრივ, ყველაზე გამოჩენილ პიროვნებას ჩუქნის; თავის მხრივ, კარდინალმა პატრიარქს სახსოვრად გადასცა ქალაქ ზაგაბრიის მფარველის, ლეთისმშობლის უნიკალური ეგზეგეტიკური „ქვის კარიბჭის ლეთისმშობელი“ (R.P.).

L'osservatore Romano





## მადლობა

ბატონებო და ქალბატონებო!  
მსურს, გამოვხატო მადლიერება და ღრმა პატივისცემა კათოლიკე სასულიერო და საერო პირების მიმართ. მადლობა მის მაღალყოვლადუსამღვდელოესობას, ეპისკოპოს ჯუზეპე პაზოტოს, რომელმაც თანაგრძნობა გამოიჩინა და ნება დამრთო, წერილობით მიმემართა „საბას“ მკითხველისა და ყველა დაინტერესებული პირისათვის.

ჩემი ვაჟიშვილი – ჯონი (იოანე) ასიტაშვილი 23 წლისაა და უკვე სამი წელია სასჯელს იხდის რუსთავის მე-16 სასჯელაღსრულების დაწესებულებაში. იქ მას საშუალება ჰქონდა, ციხის ბიბლიოთეკის ბაზაზე შეეძენა, შეესრულებინა და CD დისკზე ჩაენერა კლასიკური ჟანრის მუსიკალური ნაწარმოებები – „Loneliness in the dark“, რომელიც შემდეგ მიუძღვნა აშშ–ს მოქალაქეს, კათოლიკური ეკლესიის სასულიერო პირს, ძმა ჩარლზ კისტონს, რომელიც ამჟამად

მოღვაწეობს რომში Secretari – Losallion Family & Association FSC. Roma. Italia.

როდესაც მან შემთხვევით ჯონის მუსიკა მოისმინა, მიღებულმა შთაბეჭდილებებმა შთააგონა, რომ საოცარი სიტყვები მიეწერა მისთვის უცნობი ახალგაზრდისთვის – პატიმრისთვის. მისმა ამაღლებულმა ცნობიერებამ დაინახა პატიმრის სულიერი სამყარო. წერილი სავსეა თანაგრძნობით, მიტევებით, ნუგეშითა და იმედით. ის დაწერილია დიდი ცხოვრებისეული გამოცდილების მქონე, მაღალი ზნეობის ადამიანის მიერ (მიმონერა დღესაც გრძელდება).

მადლობა კათოლიკურ ეკლესიას და მის წიაღში მოღვაწე Secretari – Losallion Family & Association FSC–ს წევრებსა და ძმებს; ძმა ჩარლზ კისტონს.

და ბოლოს, ყველას გთხოვთ, მიუტევოთ ჩემს შვილს, რადგანაც მიტევება არის ერთადერთი გზა, რაც მას გადაარჩენს.

**გიორგი ასიტაშვილი**



ძმა ჩარლზ კისტონი



საქართველოს ათეოლოგიკა ახალგაზრდების საბჭო

## ვიდეოფესტივალი ახალციხეში

ძვირფასო მკითხველო, ალბათ, ბევრს ემახსოვრება, რომ 2011 წელს ქალაქ ახალციხეში ჩატარდა ვიდეოფესტივალი საქართველოს კათოლიკე ეკლესიის სამრევლოების ახალგაზრდებს შორის, თემაზე: „აი, ჩვენი ცხოვრება“, სადაც, ჟიურის გადაწყვეტილებით, გამარჯვებული გახდა თბილისის მარიამის ზეცად აღყვანების საკათედრო ტაძრის სამრევლოს ახალგაზრდების ჯგუფი – „ელიტა“.

ამ თვალსაზრისით, არც 2012 წელი აღმოჩნდა გამონაკლისი. იმავე ქალაქში, იმავე სასტუმროს დარბაზში („ედემი“), ამა წლის 19 მაისს ჩატარდა ვიდეოფესტივალი თემაზე: „აი, ჩვენი ცხოვრება – 2, ანუ ქარი ცვლილებებისა“. ფესტივალში მონაწილეობა მიიღო საქართველოს სხვადასხვა კუთხის ათმა სამრევლომ. კერძოდ, ახალციხის, ვალეს, არლის, თბილისის წმ. პეტრე და წმ. პავლე მოციქულთა, თბილისის საკათედრო ტაძრის, ოზურგეთის, ქუთაისის, ბათუმისა და ჭიათურის სამრევლოებმა.

ფესტივალის ჟიურიში შედიოდნენ საკმაოდ კომპეტენტური და ობიექტური პირები: ამიერკავკასიის ლათინური წესის კათოლიკეთა სამოციქულო ადმინისტრატორი, ეპისკოპოსი ჯუზეპე პაზოტო, კინო-ხელოვნებათმცოდნე, ქ-ნი ლელა ბერიძე, ხელოვნებათმცოდნე, ქ-ნი ლალი მარგველაშვილი და ტელე-ოპერატორი, ბ-ნი სერგო ფიდანია. ფესტივალის წამყვანი გახლდათ მამა მიშა სურმავე. ფესტივალს ესწრებოდა ას ორმოცდაათი ახალგაზრდა.

ლონისძიება საკმაოდ დაძაბულ და ემოციურ ვითარებაში მიმდინარეობდა, ყველა სამრევლოს თავისებურად ლამაზად ჰქონდა დანახული და გადმოცემული მოცემული თემა. ეს შეხვედრა იყო ულამაზესი ნიშანი ჩვენი ეკლესიის ერთიანობისა და ახალგაზრდების ერთმანეთთან უფრო



თბილისის კათედრალის ახალგაზრდები

დაახლოებისა. ვიდეოფესტივალი ასახელებდა ექვს ნომინაციას: პრიზი საუკეთესო რეჟისურისათვის გადაეცა საკათედრო ტაძრის მრევლს; საუკეთესო ოპერატორი – ბათუმის სამრევლოს; პრიზი საუკეთესო გაფორმებისათვის მოიპოვა ვალეს სამრევლომ; ქალისა და მამაკაცის როლების საუკეთესო შესრულებისათვის პრიზები გადაეცათ არლის სამრევლოს ახალგაზრდებს.

ჟიურის ერთობლივი გადაწყვეტილებით, **ფესტივალის გამარჯვებული გახდა არლის სამრევლო**. ჟიურისაგან ყველა გუნდმა მიიღო დამსახურებული შექება და შენიშვნებიც, მომავალში გასათვალისწინებლად.

იყო საზეიმო განწყობა, ყველა აღფრთოვანებული იყო, ყველას ერთნაირად უხაროდა გამარჯვება, ყველას თვალეში ბედნიერების სხივი კრთოდა; იყო ემოციები და იგრძნობოდა ერთმანეთის მიმართ თბილი დამოკიდებულება.

გვსურს, დიდი მადლობა გადაეუ-

ხადოთ ახალგაზრდულ საბჭოს, მამა კარლოს ხელმძღვანელობით, დიდი მადლობა ჟიურის ამ ლამაზი საჩუქრისათვის, დიდი მადლობა სასტუმრო „ედემი“ მომსახურე ყველა პერსონალს, განსაკუთრებით კი ქ-ნ მარინას შესანიშნავი მასპინძლობისთვის, მადლობა ყველა სამრევლოს მონაწილეობისათვის. ჩვენ, არლის სამრევლოს ახალგაზრდებს, გვსურს, მადლობა გადავუხადოთ მამა მიშა სურმავეს, რომელმაც საშუალება მოგვცა, გაგვეკეთებინა ფილმი. უპირველეს ყოვლისა, მადლობა ღმერთს, რომ ტარდება ასეთი ღონისძიებები. ვიცით, რომ ეს ყველაფერი უნდა იყოს მხოლოდ და მხოლოდ ღმერთის სადიდებლად და ეკლესიის სასიკეთოდ. ჩვენ გჯერა ერთი რამის, რომ გაიმარჯვა მეგობრობამ, სიყვარულმა და სიკეთემ, რაც გადაარჩენს სამყაროს.

დიდი სიყვარულით,  
არლის წმიდა იოსების კათოლიკე  
ეკლესიის ახალგაზრდები

## განუსვენე მათ, უფალო!




**სიმონ თამაშაშვილი**

\* 05.11.1951 – ვალე  
† 14.06.2012 – ვალე



**სარგო არუთიანიანი**

\* 30.11.1947 – ვალე  
† 05.06.2012 – ვალე




**ანტონ გიშვილი**

\* 05.08.1937 – უღე  
† 31.05.2012 – უღე



**ნინა თათუნაშვილი–  
განუვლიშვილისა**

\* 02.10.1931 – არალი  
† 17.06.2012 – ვალე



**სიმონ გუშაშვილი**

\* 07.01.1925 – ხიზაბურა  
† 22.06.2012 – ხიზაბურა

## სარჩევი

რედაქციის გვერდი .....	2
კათოლიკე ეკლესია მსოფლიოში .....	4
კათოლიკე ეკლესია საქართველოში .....	6
ქრისტიანული ოჯახი .....	16
სადაურსა, სად წაიყვან... ..	17
ეკუმენური გვერდი .....	18
ინფორმაცია .....	20
ახალგაზრდული გვერდი .....	23
საგანგებო ჩანართი .....	I-IV

## რედაქცია:

მამა გაბრიელე ბრაგანტინი  
ნუგზარ ბარდაველიძე  
ნატო ბიგვაკა  
ვერიკო ნოზაძე  
მერაბ ღაღანიძე  
ზაზა შათირიშვილი  
ციცინო ხითარიშვილი

## მისამართი:

თბილისი, გია აბესაძის ქ. №4  
ტელ.: 298-95-16  
რეგისტრაციის № 1853  
დაარსდა 1994 წ.  
მანანა ანდრიაძის მიერ  
© „საბა“, 2012





მომლოცველობა ეფესოსა და კაბადოკიაში



საიუბილეო ზეიმი წეროვანში – 16 ივნისი 2012

